

Kutumba

Kulema kwakufundisha kutumba
Mazanvu Awumi

Jon na Judith Witt



Kutumba

Kulema kwakufundisha kutumba Mazanvu Awumi

Jon na Judith Witt
Dignity

Kuloñesha kwatachi, Chishikamuneni 2017
Lunda

Ñovu Yakusoneka ni Nshimbi Yakwanukisha (Kuloñesha kwatachi, Chishikamuneni 2017)

Iwu mudimu wejima muwunahitili hiñovu © Ya Jon Na Judith Witt ni akwa Dignity 2017 nayuma yikwawu yinabuli mumaluña yinasonekiwu kwishina munahitili iyi yuma yejima.

Ansoneki akwata ñovu hakwila afwachiki hansonekelu yanyidimu yejima yidi muniwu Mukanda iwu mudimu akutweshwa kuwudisha muwekalila nakuwutandisha. Iwu mudimu anatweshi kuwuvulisha muwekalila nakuwutandisha kudi akwa Dignity (Worldwide), Izanvu dadimena mukutwalekahu. Dadisonekesha mu Putu ni Wales hanambala 6394480. Kusonekesha izanvu dawa kaluwi akwakukwashana na nambala 1122656

Ansoneki: Jon na Judith Witt.

Kuhitulukamu nakolola: Jo Kimball.

Mukwakubalumuna: Willams R. Mukangala

Neyi wunakufwila kutandisha nyikandiyi sonekelaku kudi akwa Dignity kulonda akwinki chitejelu:

Dignity, 6 Barlow Moor Road, Didsbury, Manchester, M20 6TR, United Kingdom

E: hello@dignityonline.org.uk

T: +44 (0) 7340 573 937

Yikunku Yamu Mumukanda Wajila

Mukanda wajila, Kuloñesha kwakwihi kunamwekeshuwu Mukayi Kejima ® Anglicized, NIV ® Nshimbi © 1979, 1984, 2011 by Biblical Inc, ® anawuzatishi nachitejelu. Ñovu jejima jinakiñewi mwahita Kayi.

Yinjikijilu na kufundeka

Chinjikijilu chakwinyika nachu nikufundeka yinaloñeshewu kudi Metro Icon Studio 5 wunedishewu kudi SyncFusion. Wunazatishuwu chakuyiteja.

Kutumba Mazanvu Amaha	1
Mutonde Wekondi	1
Kutumbaña Mazanvu mapampa na mapampa	2
Njila Jiyendi (2) mwa Kutumbila Izanvu Dadiha Dawumi	3
Njila Yatachi (1): Kuvulishaña izanvu	4
Njila ya Muchiyendi (2): Kutambikaña Mabwambu	7
Kufundisha ni Kulomba	9
Kukalakesha Yuma	9
Jinjila Mwakukalakela Kuhitila Muniyi Yuma	9
Muwatela Kukalakesha Tunyikanda Twakufundisha Nachu	10
Mpanji 1: Menji, Nyitonde ni Luzwizu	13
Mpanji 2: Wumi Wekala Kuhitila Muchisaka	19
Mpanji 3: Kukalakesha Izanvu Dawumi Mumukala Weyi	24
Mpanji 4: Wudi Wejima Wukweti Iluña	36
Mpanji 5: Kulumbulula kwa Yuma Yakukalakesha	47
Mpanji 6: Kuloñesha na Kutanjika Kwayuma	48
Nsañu	55

Kutumba Mazanvu Amaha

Donsu izanvu da wumi datela kutalahu na kutumba cheñi izanvu dikwawu dawumi kwekwawu kwakwihi nawena hachaaka. Ichi chikwikala mumukala momumu hela muchituñilu hela hadaha kwikali kwashakamaña mbwabu.

Iyi yuma ya kufundisha nachu yikukwinka eyi ni izanvu deyi Yuma yakukalakesha. Chikukuleja nawa mwakutumbila izanvu dikwawu. Cheñi nawa dikukuleja eyi muwatelela kufundishila anlomboli amazanvu amaha.

Ni kufwila kwa swayi: Ejima mazanvu awumi atela eseki kutumba izanvu dadiha kwakwihi nawena hachaaka hachaaka.

Mutondū Wekondi

Nyitondū Yamakondi yakula dehi yaletēña nyitombu yanyana kamakondi kwakwihi nawena. Mbutu yayeni yeneni yakwashaña ku kusapuka kwayayiha nichiyikushika yanyanya hakudikulila ikawayu. Ichi nawa dichi chitwadikufwila wejima wetu kwila na mazanvu etu.

Mutondū waweni wekondi wadifwilaña waweni. Wahanaña wumi wawu kulonda nyitondū yanyana kamakondi yitweshi kukula na kusoña ni nyikambu. Etu hitunakeñi netu tufwuku; izanvu detu dikutwalekahu. Lushimbi lolwakuhana wumi kudi akwetu amakwawu.

Chiña hohu neyi etu tudi na maana awuñamba neyi Yesu nakwiteja mazanvu etu kahuna mpiji ni Mali kudi izanvu dikwawu neyi nehi tukwikala akiya momwenomu mutundi.

Kutumbaña Mazanvu mapampa na mapampa

Mazanvu awumi atela wanyi kushakama chochimu mpiji yayilehi. Eyi watela wutambikeña antu amaha eñili mwizanvu. Neyi manzanvu enu anadiñi nakuhumañana himpinji, izanvu denu datela kwesekahu kutumbahu Izanvu dikwawu Dawumi kwakamwihi nawena. Wunateli nawa kutumba mazanvu amavulu muwunatwesheli



TALAKU ana atela kwikala anlomboli amawahi



YIFUNDISHI wena chatela kutwamininawu ni **KUTUMBA** izanvu dadiha mwiluña hela mwakamwihi muchituñilu chenu



KWASHAKU nlomboli wenzanvu dadiha



SUBULAKU nlomboli ni izanvu akalakali ikawawu



TAMBIKAKU anlomboli ezanvu dadiha ahumañani kamu mukakweji mwizanvu dawenyimbu



FUNTILAKUMU muwumi wenzanvu dadiha ni mwizanvu daneyi aweni neyi munahiti mpiji

Njila Jiyendi (2) mwa Kutumbila Izanvu Dadiha Dawumi

Hanu tunakuya nakuyileja enu jijila jiyendi ha kutumba izanvu dadiha. Yakutachika ayitambikaña nawu **Kuvulishaña Izanvu**, yamuchiyendi ayitambikaña nawu **Kutambika Amabwambu**.

Etu tunakuya nakukalakesha nyevulu yakufuundeka kulonda yitukushuku etu kutiyisha jeniji jinjila. Ahanu nawa hadi chikukulombola eyi chinalumbuluki yinjikijilu.

Chinjikijilu Kulumbulula



Iwu diyi nlomboli wenzanvu.



Iwu diyi muntu wunakufudishawu kudi nlomboli ayitwaminineña. Wena nawa akutwaminina izanvu dawu awenawu.



Iwu hi muntu wa mwizanvu.



Nlomboli wamwiha wunakufundishawu.




Ibwambu wunatambikuwu mwizanvu.

Njila Yatachi (1): Kuvulishaña izanvu


Iyi njila ya kutumba izanvu dawumi dikukalakeshewa hohu neyi:

- Izanvu dawumi dinadiñi nakuhumaña kupandakana hadi tukweji tutanu na kamu.
- Izanvu dawumi dakola nawa dinakukulila hamu chachiwahi.
- Kweniku nawa kudi anlomboli ashikila anabandiki hawumu ana kuloñesha.

Hanu hadi mwevulu wunakwimana nakumwekesha izanvu dawumi. Kudi Antwamina a yedi (2) ni antu ikumi (10) akakupompa.




Iwu nlomboli yomweni wezanvu tukumutambika netu Yowanu nadiñi na kufundisha nikumukwasha Pili adizi mwakulombwela izanvu dawumi chachiwahi.




Neyi Pili wudi na kutiya neyi wukutweshwa kukalakala nezanvu chachiwahi, Yowanu mukutwalekahu nakulombola izanvu didiku dehi iku Pili wukuya na kutumba izanvu dadiha. Pili bayi neyi wukusenda antu akwizanvu da Yowanu wanyi. Izanvu dadiha dikudiwenena antu awu amaha awenawu.


Izanvu dadeni datachi da Yowanu na Pili



Pili natachiki izanvu damuchiyedi nakutambika antu amaha mudena izanvu odu iku
Yowanu saña atwalekelayi nakulombola izanvu datachi




Nzanvu da Yowanu
ni antu adimu




Nzanvu da Pili
ni antu amaha

Mukampinji kantesha, hamu Yowanu na Pili ananonumu muntu wumu hela ayendi mumazanvu awu amaha ayifundishi.



Izanvu da Yowanu
munakufundishayi anlomboli
amaha ayedi (2)




Izanvu da Pili
amunakufundishayi
nlomboli wumu wamwiha

Iyi njiñumuki yinateli kumwekana kapampa ni kapampa.


Njila ya Muchiyendi (2): Kutambikaña Mabwambu

Iyi njila ya kutumbaña mazanvu awumi yikuzatika hohu neyi izanvu da zeya cheñi nikukalakala chashikila chachiwahi, neyi idi nzanvu da wumi dikwiluka amambwabu ni kwekalawu munyikala yadikumawu nayu hela muchituñilu.


Hanu etu tudi nezanvu detu dawumi mwishina. Mudi anlomboli ayendi ni akwakupompa ikumi. Iwu wujiya wunakwimenaku anlomboli; iyi yawoñakana yinakushimu antu akwakupompa.




Chayinu mpiji chinambuki chantesha. Esita iwu wudi membela wezanvu natambiki amabwambu jidi ayendi Lovemore ni Glory kufuma mumukala wudihachintampu chamakilometa asatu (3km). Esita diku oku ka diyaji kawoñakana kawulombu wawusefu. Esita amambwabu jindi ditu itu tutumbwa.




Esita nafukuli nindi amambwabu jidi adi na muchima weluña chituñilu chawu, nawa nachimoni kulema mudi wena aatwaminini izanvu dawumi. Ni kukala kudi hohu wena hiyaneluki chekala izanvu dawumiku, ni chatela Nzambi kukoñayi muyituñilu yanyikala yawu. Esita amambwabu jidi apompaña mwinzanvu didi dawumi kamu mukakweji.



Esita amambwabu jidi a Lovemore na Glory anadiñi na kupompa mwi izanvu da wumi muchituñilu chamunyikala ya Esita hadi kakweji kamu. Ichi himpinji yakwila wena atachiki izanvu mwiluña damumukala wawu awenawu. Lovemore na Glory akukeña wukwashi kufuma kudi Esita awa anlomboli aweni atachi.



Izanvu dakusambila
dinakutweleka hahu na Esita



Izanvu dadiha
dinakutwaminawu
Lovemore na Glory

Kufundisha ni Kulomba

Neyi wunakuya na kutumba izanvu dawumi chidi chalema hama kwila yuma yiyedi. Tachi, eyi watela wulombi neyi Nzambi wukukwashaku kutachi izanvu dawumi dadiha, wanaku antu atelela wutweshi nawa kuwana nyikoleki yikukañesha kutachika kwezanvu dawumi dadiha. Oyu nyikoleki hadaha yikwikala kukala kwa muspiritu hela hadaha hi makukala anabuli kukwashawu mu nyikala yawu.

Eyi watela nawa wufundshi antu awa anakutachika izanvu dadiha. Kweniku nawa kudi yibalu yiyendi mwakufundishilaña antu kulombola izanvu da wumi nawa watela wili yabalu jejima.

Ichi chibalu chatachi dichu chakufundisha anlomboli ezanvu dadiha mujinjila mwakutumbila izanvu dadiha dawumi. Ichi chinakumwekana nakuzatisha “Mukuvulisha Kwenzanvu” ni “Kutabikaña Amambwabu” jinjila mwa kutumbila izanvu. Ichi chiña hohu chimwekani kulonda mazanvu amaha atiyi nawu anayikumi ni neyi wudi nawu bwambu wawuwahi nezanvu dakutachika.

Ichi chibalu chamu chiyendi chochu cha kufundisha anlomboli amaha. Muwunu mukanda mudi yuma yonsu yiwukukeña yakufundisha oku.

Kukalakesha Yuma

Iku kufundisha twatela ku kukalakesha mujinjila jiyedi jamboka.

1. Mwiizanvu tudizishi antu amavulu hampinji yimu, chidi neyi kadizanzu kawumi kanlomboli ni anlomboli ashikilamu.
2. Kuzatisha muntu namukwawu nakadizanzu kanyanya, imu mudi antu adi mwishina dawantu atanu.

Jinjila Mwakukalakela Kuhitila Muniyi Yuma

Tufukulihu jinjila jamboka jiyedi Muwatela kukalakeshela iyi yuma. Watela kutonda yimu yikukalakala chachiwahi nawa antu adi mwizanzu deyi. Chalema hama neyi wukutonda njila yikushikila chachiwahi kudi owu antu adi mwizanzu deyi. Mujinjila jejima iji watela wutachiki nawa nikukumisha nampinji yakumushimeka ni Kulomba.

Kufukula 1: Humañanenu neyi dikalu nezanvu deyi dawumi

Ichi chinakulumbulula nawu enu mwatela muhumañani hadi ma ora ayedi kamu mumulungu, hadi nyilungu yiwana (4). (Ichi chikwikala chakubombelahu kunyilungu yamwizanvu dawumi.) Eyi nawa watela kulondeja kuhanjika iku mulungu himulungu.

- Mulungu 1:** Mpanji 1 - Menji, Nyitonde, ni Luzwizu - Masamu 1 kudifukula (hadi chikunku cha ora, 30)
Mpanji 2 - Wumi wekala kuhitila muchisaka (ora yimu, 1)
- Mulungu 2:** Mpanji 3 - Kukalakesha izanvu dawami mumukala weyi (ora jiyedi, 2)
- Mulungu 3:** Mpanji 4 - Wudi wejima wukweti iluña (ora yimu, 1)
Mpanji 5 - Kulumbulula kwa yuma yakukalakesha (ora yimu, 1)
- Mulungu 4:** Mpanji 6 - Kuloñesha na kutanjika kwayuma (ora yimu, 1)
Malwihu na kutwalekahu (hadi ora yimu, 1)

Kufukula 2: Nabudidi mpanji jiyedi

Neyi antu akukeña kwikala nampinji yantesha yakukuñulwila yuma yakudiza hamu, iyi watela wuhitulukimu muyuma yakutañisha mumufuku ayedi (2) achikunku. Iyi nawa watela kukuñwija yejima mukudiza kwantetemena hela mukudiza kwahachayili hefuku dejim.

- Ifuku 1:** Mpanji 1 - Menji, Nyitonde, ni Luzwizu - Masamu 1 kudifukula (hadi chikunku cha ora, 30)
Mpanji 2 - Wumi wekala kuhitila muchisaka (ora yimu, 1)
Mpanji 3 - Kukalakesha izanvu dawami mumukala weyi (ora jiyedi, 2)
- Ifuku 2:** Mpanji 4 - Wudi wejima wukweti iluña (ora yimu, 1)
Mpanji 5 - Kulumbulula kwa yuma yakukalakesha (ora yimu, 1)
Mpanji 6 - Kuloñesha na kutanjika kwayuma (ora yimu, 1)
Malwihu na kutwalekahu (hadi ora yimu, 1)

Muwatela Kukalakesha Tunyikanda Twakufundisha Nachu

Itu tunyikanda tudi nayuma yejima ya kuhanjika yiwukukeña hakukwasha antu atachiki mazanvu awumi. Chidi chasweja kulema hama eyi kuhemba twenitu tunyikanda nakulondejamu munakukulejau eyi kwila. Yitoñojoka yayivulu ni nyidimu yineñilumu nakwidisha tunu tunyikanda hadi yaaka yayivulu. Neyi wujimbeshahu chibalu, eyi nawa wakajimbeshu iseka diwatela kuwana muniwu mudimu.

Kuhanjika kwejima kudi nayibalu yikukutwaminina eyi kulonda wutweshi kwilisha iyi mpanji atweshi kuyitiya kuwaha kudi muntu wejima wudumu. Iyi yabalu mukuyilukila kunyevulu nawa cheñi mukwikala nikuhoshahosha, malwihu, kulomba hela jinjala jajivulu jamboka jamaleñu kulonda kudiza nachu.

Kuhanjika kunu ana kwiloñeshi nakushamu kukasunuka kufumina kudi muntu wudi wejima hadaha kuhitila mukutaña, mukudihujola wumu namukwawu, muyisela yamaleñu hela kushimuna nsañu. Tunachiwani neyi iyi ya swayi yikukalakala chashikila munjila yakutañisha kupandakana hohu kuhoshaña nawantu.



Kufwila

Kuhanjika kwejima kudi nakufwila kuyedi hela kusatu. Ichi dichi chikukwinyikilaña eyi oyu yiwunakutañisha izanvu. Eyi watela wikali nanikufwila mwiwitoñojoka nikudihula eyi aweneyi neyi wunakukwasha antu mwashikila. Eyi bayi wuleja izanvu kufwila hakutachika kwampanjiku.



Kutaña Kwamumukanda Wajila

Iwu mwevulu wamukanda wudi neyi wunakukeña kutaña mazu amumukanda waNzambi chakola hewulu kudi izanvu. Eyi hadaha wukuchiwana neyi chikukwashaku kwihula wumu hela ayedi adi mwizanzu atañi chileñahu dehi kulonda wena elumu hela akani. Chiña wuchiluki neyi antu makwawu akutweshi wanyi kutaña. Kuyihula neyi atañi henohu wena akutweshi wanyi chikuyiletesha kusawuka.



Lwihu

Malwihu hinjala yimu yeneneyi yakuletesha wudi wejima ekali munoyu yinakutañawu. Chidi chalema wejima amoni chinjikijilu cha lwihu, eyi wihuli izanvu lwihu nezu da hewulu nikuyikonkomwena wena akuuli malwihu.



Mudimu Wakwila

Antu adizaña kuhitila muyisela. Ichi dichi kwekalila yakwila. Chinjikijilu chakwila chinakulumbulula nawu eyi watela wulondeji mukwiila nshimbi jezanvu.



Nsañu

Nsañu hinjila yamana yakushimuna yuma nikudiza kufuma kuyuma yadifwana neyi oyu yidi munsañu. Wudi wejima wakeña nsañu! Hejima hiwukumona ichi chinjikijilu chalema hama chinakukuleja nawu eyi watela wushimuni nsañu. Chatelela nawa chaloña neyi chikutweshaka nawa esakaku kwikalamu namaleñu!



Kukenwinamu Chanti

Mpinji jikwawu twatela kuyinka jinshimbi nikukulejañamu dehi. Ichi chinjikijilu hichikunku cha mazu chikwinyikila eyi nawa bayi wuleja izanvu diwunakufundishaku.



Kuhosha

Iyi diyi yibalu kunekali eyi kwaswayi kuhosha nawantu, kuyifundisha mujinjila jayaaku.



Kulomba

Mwahoshañayi Nzambi nawantu jindi mwalema nankashi. Tunakukeña tuyikonkomweni kulomba neyi chikutwesheka. Neyi eyi wukumona ichi chinjikilu yili antu alombi. Chachiwahi kwikala nakulomba kwamwizanvu ni antu anakulembelelaku wumu namukwawu, kulembelela munjila jamboka nijimpinji jinamboki.

Mpanji 1: Menji, Nyitondy ni Luzwizu



Kufwila

Iku hikutaña kwakwihi Kwa mazu aNzambi adi haMasamu 1. Nsapi yanyiyi yitoñojoka diyi iyi yinalondeli.

- Etu chiña tufukuli wumi wetu neyi mutondy, wa kutumbawu kudi Nzambi, wudi na nyikabu.
- Etu tukwikala hohu Nyitondy yakola hakufumishaña wuswa kudi Nzambi.
- Neyi etu chitunakukula, etu tukukalakala nyidimu yeñi nayeñi chitunakumushimeka Nzambi.



Kutaña Kwamumukanda Wajila

Masamu 1 hikulumbulula kwamukanda wamasamu. Awushiliku kumasamu mumafuku owu nawa dimu munadilumbululiyi Nsoneki nakwidisha yitoñojoka yindi yekwawu kwaniwu Mukanda. Ichi chaletesha kwikakala chalema hama.

Tañaku Masamu 1 chakañuka kudi izanvu.

Masamu 1

¹Wakoleka diyi ona wumu

wabulaña kwenda muyimañu yawatama,
wabulaña kwimana munjila yawakwanshidi,
wabulaña kushakama hashakamañawu akakutañula .

²Ilaña yena watiyaña kuwaha nanshimbi jaYehova,
nshimbi jindi watoñojokamu nimwaana niwufuku.

³Wekala neyi mutondy wakatumba kutupila twamenji,
wasoñaña nyikambu yindi hachilaka chindi,
mafu indi hiyalepukañaku,
yejima yikwilawu yalumbulukaña hohu.

⁴Atama hiyekala chochochuku;
wena kwawu adi neyi muzuñu
walelokaña nampepela.

⁵Dichi atama hiyakemana mwifuku dakusompaku,
hela akanshidi hiyakemana muchipompelu chawaloñaku.

⁶*Yehova weluka njila yawaloña,
ilaña njila yawatama yakutwaminina kukukisaka.”*



Lwihu

Ihulaku izanvu, nyitonde yamuchidinyi yekala yakola muloñadi chiyekalila yakola? Aha dinu yihuli wena, neyi mutonde wakolaña iñahi? (Fukulaku nsañu yamwaana, nsañu ya menji nikubula yatama.)



Nyitonde

Hoshenu hadi etu tukutoñojoka iñahi ha wumi wetu kwikala neyi nyitonde yinakusoña nyikabu. Nzambi nakukeña nyitonde yikali yakola nawa yataluka, yikusoñaña nyikabu yayiwahi hampiji yayiwahi.

Etu twatela twikali akola kumujimba niku Sipilitu kulonda kuletaña nyikabu kudi akwetu amakwawu.

Hoshaku neyi etu nawa twatela kwikala mutonde watama. Twatela nawa kubula kusoña nyikabu nikwikala asweja kuzeya. Tukwikala asweja kuzeya namuntu wetu wamukulu wachisemwa nikudikeña etu aweni, hi mwevulu wakutalilahu.



Lwihu

Ihulaku izanvu, kumukudihi kwamenaña mbutu chiwahi? Yakeñañadi hakwila yimeni? Yidi hohamu neyi nyitonde? Kwakula kuwunakukeña himenji. Mwalulakena tuloña twejima twamumatuña awantu eyila eyi wukuwana Nyitonde chineli kututa kudi heseki kwadishaña Nyitonde kuhitila munyiji nikuletsha mbutu ni nyitonde kukula nakukola.



Lumbuluku neyi menji anakwimenaku wumi waNzambi iwu wunekali diyi Sipiritu Wajila. Sipiritu Wajila nakukeña kwichila menji nikukulisha wumi waniyi nyitonde (neyi nyitonde yinatumbiwu kutupila twamenji) kulonda yena yitweshi kusoña nyikabu nikwikala yakola. Neyi wumi wetu akuwutumba kukamwiha naSipiritu Wajila etu twikali neyi Nyitonde yakola.

Idi isamu didi munjila jiyedi muwumi. Injila yimu diyi yakumutiyisha

Nzambi kuwaha nimwakuhandila muchituñili nichisaka cheyi. Njila yikwawu yoyi yakubula kumutiyisha Nzambi kuwaha nikudikeña eyi aweni nikubula kukudilahu kudi chituñili cheyi.

Kusumbwisha ichi nesamu, kudi njila yimu yidi mumpuña yaYehova (v1-3) niyikwawu iyi yidi munjila yawatama (v4-5). Kutonda kweniku kudi kumbidi yanetu muyuma yejima yitunakwila mukuhanda kwetu.



Lwihu

Maluñanyi anambujoki mumawumi etu itunatweshi kutonda hela neyi nehi kumulonda Nzambi? Esekaku kwikala nawantu atweshi kutoñojoka bayi hohu ja hawumi wawu awenawuku, ndochu jachituñili chawu?

Indi mumaluñanyi mwejima mutwatela ninetu kumutoñojokela Nzambi.



Kukunkulula kwanidi isamu havesi havesi

Etu twadikwikala hela hitwadi kwikala asemuka dehi kamuchiyediku nakumulonda Yehovaku. Ninidi Isamu danaana anakumulonda Nzambi ninaana anakubula kumulonda Nzambi. Idi Isamu atela kudikalakesha neyi chuma chakutwinyikila hakutonda kwejima kutukwila hakukalakala kwanyidimu yetu nimumaluña ejima muma wumi etu.

Vesi 1

“Wakoleka diyi ona wumu

wabulaña kwenda muyimañu yawatama,

wabulaña kwimana munjila yawakwanshidi,

wabulaña kushakama hashakamañawu akakutañula .”

Akwanshidi ni akwakudiwula diwu ana anabuli chikuhwelela mudi Nzambi. Chuma chinakuzañalesha chidi nawu kwimanaña munjila yawakwanshidi yinashimunewi nawu yikukutwala kukudiwula amakwawu ni Nzambi. Hiiluña dakudinka wanta. Etu tukudifukula etu awenetu neyi yetu anabadiki nawa anashikili kubadika amakwawu.

Vesi 2

*"Ilaña yena watiyaña kuwaha nanshimbi jaYehova,
nshimbi jindi watoñojokamu nimwaana niwufuku."*

Kudi maseka ayendi muniyi vesi. 'Kuwaha' nanshimbi jaYehova chinakulumbulula kwawu nawu muntu chalala nalemeshi Nzambi, namazu indi ni njijila jindi kubadika yuma yekwawu yejima. Ni izu 'dakutoñojokamu' dalumbuluka kutañamu hela kuhitulukamu. Neyi muntu wukusha yitoñojoka yindi kwi izu da Nzambi nakukeñakeña kwiluka mudinalumbulukili, diku kutoñojokamu mpinji yejima.

Awa akumulonda Nzambi adi chiwahi nikuzañalala neyi wena akufukula kwila chaloña nachinakukeñayi Nzambi. Atoñojokaña izu da Nzambi ifuku dejima. Ichi chaletshaña kuhimpika mudi wena.

Vesi 3

*"Wekala neyi mutondu wakutumba kutupila twamenji,
wasoñaña nyikambu yindi hachilaka chindi,
mafu indi hiyalepukañaku,
yejima yikwilawu yalumbulukaña hohu."*

Owu atiyiyaña kuwaha na Nzambi ayitumba kwakamwihi natupila, munyenvu wameji wayikwashaña wena. Kudi nawa maseka asatu mudi ichi:

Wena asoñaña nyikambu yawu muchilaaka. Etu wejima wetu tudi nayilaaka yitwasoñaña ni yilaaka yakubula kusoña yayivulu. Ichi chachikulu.

Mafu indi hiyalepukañaku. Wunambuki na mutondu wudi wonsu wudi muchinkalampata mwawuminina, owu anatumbuwu kumeji akutweshwa kwimana chakola mumpinji yakala, wumi wawu hiwukulepukaku.

Yejima yakwilawu yikulumbuluka - hohu-ichi hichinakulumbulula nawu tukwikala namali amavulukulu, ilaña kukalakala kwa Nzambi kukuwana

kutwesha.

Mutonde wukukula nikuhana wulelu ni nyikambu kudi wudi wejima.
Wahanaña nyikabu yayiwahi hampinji yaloña ni kwimika mushindu
kukukala kwezaña mujila yindi.

Ichi chambuka kufuma kudi watama.

Vesi 4

*“Atama hiyekala chochochuku;
wena kwawu adi neyi muzuñu
walelokaña nampepela.”*

Awa atama adi neyi muzuñu, tuyiketu twanyanya twanswadi twalelokaña
nampepela. Awa atama munu mu Masamu anakulumbulu owu anyi:

- Akakutañula Nzambi.
- Anadiwuli izu da Nzambi
- Adiwula Nzambi munjila jakuhanda kwa wumi wawu.

Wena kwawu hiyantu abula ni wumi ni yuma. Neyi kweseka kwamukaayi
diyi mpepela komana atama hiyakawanika anayitumbuku, ashimata
kukamwihi nakaloñaku, wena ayilelola dehi nawa hiyakweti kutandumuka
kwakuyizatisa kudi Nzambiku, yisaka yawu, hela yituñilu yawuku.

Vesi 5

*“Dichi atama hiyakemana mwifuku dakusompaku,
hela akanshidi hiyakemana muchipompelu chawaloñaku.”*

Antu amavulu anakuhweleli nawu iyi nsañu yinakwiniyika kusompesha
kwakukumisha kwakela Nzambi hakubabesha atama. Imu hidimuku.
Chinakuhosha hawumi chiyanu mpinji yakachawichi. Yinu vesi
yalumbulula hatooka nawu owu anabuli kutumbawu ku menji
hiyakatwesha kwimana muniwu wumi wakuloñaku, wena akalepuka.
Cheñi nawa akayikunkulamu muchisaka chaNzambi, mukupompa
kwawaloña.

Vesi 6

*“Yehova weluka njila yawaloña,
ilaña njila yawatama yakutwaminina kukukisaka.”*

Etu tunakukeñeka twikali antu awa anakutalayi Nzambi, dichi etu chiña atutumbi ni kutushimatisha mumazu indi. Etu hitunakukeña etu aweni ni yituñilu yetu yikisikuku, yilepukuku.



Iwulu - Lwihu

Ihulaku izanvu neyi indi akudilumbulu iñahi iwulu. Talenu kwakula kudi neyi kutoha, wulombu wawusombu, mwezunuka, mwamuwahi mwamulehi.

Lumbululaku neyi Nzambi wudi hahalehi nawa wasweja lubanji kubadika iwulu ni wumi wetu anawuteni wikali wakumushimekaña yena. Kwikala mutondu wakutumba kumenji chinakushimuna kwikala mutondu wawulehi wudi nanyitayi yayu yinatalishi kwiwulu nakumushimeka Nzambi. Ichi chelaña chambu kudi wudi wejima.



Kulomba

Lombeledaku wudi wejima neyi tukwikala ashimatisha chachiwahi. Nawa mushimekenu Nzambi hamu.

Mpanji 2: Wumi Wekala Kuhitila Muchisaka



Kufwila

Nakufwila kweniku kudiza diku iku:

- Kwiluka indi chisaka chaNzambi hichumanyi ni chazatañayi nachu.
- Adizi kunuñaña.
- Adizi indi chisaka chelañadi hamu ni mazanvu awumi achilaña ichi ñahi.
- Atoñojokuhu mwakutachikila izanvu mumukala.



Nsañu: Ya Chawija Cha Mwanta.

Kwadiñi Mwanta, iwu watambikili antu amavulu kufuma muwuloñu windi kuchawija chasweja kutoha hama. Antu nawa afumini kweñi na kweñi kumaluña ejima nakuya kuchawija. Chelili chadiñi hichidika champinji yalema hama. Wudi wejima nawa wavweleli yakuvwala yawu yayiwahi ni kutwala nyilambu yawu kudi Mwanta. Kwenoku Kwadiñi antu asweja kuvula kampi kufuma kumaluña amavulu amboka. Ichi nawa chamutiyishili Mwanta muzañalu hama. Yena wayitambikili wena muloña wakeñeli kumona wanta windi, niyisaka yawantu yayulileñayi.

Hakuhita kwamafuku wachimweni nindi antu amavulu amumuchidi windi aditadikishili. Aditadikishili nawu hinyi wadiñi chachiwahi mukuhemba yaaku. Aditadikishili nawu wembili tumina twatuwahi hinyi. Aditadikishili ni nanawa antu akufuma mumukala wawu wumu. Chashikili nikumaluña iku kwadiñi antuñi janyikala eñi na eñi ahumañeni nawantu acheñi abulaña kubulakana hamu dikalu.

Mwanta chumichi chaswejeli kumuluwañesha hama. Yena wahayamini nindi antu indi akwikala ñahi adambula chamuchidiwu. Wafukwili kwilahu chuma.

Wufuku wumu wapompesheli antuñi janyikala amazanvu amboka awa enjili hamu. Hewulu mukapeka kakuhumañena wakudikilumu ifunda mukapala. Wahosheli nindi ntuñi yamukala wumu wukushika hefunda dinakuyekela nkawindi wukwikala mwanta. Wukumwika wuloñu wawanta windi wejima kudi yena.

Antuñi yanyikala ahayamini hama ni Kufwila kwatachikili nakudizuñisha wumu namukwawu. Wudi wejima wahadi wena wesekeli kukadama habañu, ilañā aka akañanya. Amavulu wena adiñi hohu nakudizuñisha, chakwila wena avulamenaku nikunona nfunda chikupu. Chimunahiti ora yampinji wudi wejima wazeyeli nikufutamu mukufwila.

Aha dinu Mwanta wababala eza nisee mukachi na kuhosha, “Muloñadi chimunakutoñojoka nenu wumu hadenu wukwila iwu mudimu? Hichikutweshekaku, aka kapala kadi hahahahehi hakwila eyi wushikuhu.” Yena aha wapompesheli amayala atanu emani hamaseki, ni kwila amakwawu asatu emani hamafwiji awu, cheñi nimakwawu ayendi hewulu dawena. Awa antuñi yanyikala elili neyi chayilejeluwu kwila nakwimana wumu hewulu damu kwawu.kushala nikwati nakushika ilañā hiyashikiluku. Mwanta yamwenindi ichi akadama ni hewulu dawu ashika ni hefunda yamwenindi.

Wudi wejima welukili ichi chadiñiyi nakukeñayi mwanta kuhosha. Iku wena anakudizuñisha nikutomboka nakuditadikisha, kweseka chikupu halwawu hiyatwesheli kuchilaku. Chaletesheli wejima wawu hamu kulonda ashiki hefunda. Hela tuhu Mwanta yomwenidi wakeñeli wukwashi wawudiwejima kulonda achili ichi.



Lwihu

Ihulaku izanvu indi wena anatoñojoki nawu iyi nsañu ya chawija cha Mwanta yinalumbululidi? Iyi nsañu yinakushimuna kwikala wakutalilahu neyi chatela kwikala Chipompelu munyikala yamumaluña a mumatuña awantu eyila. Keñakeñaku kwakula kukuhosha hadi kukañesha kwa yaambu ni kukalakela hamu.



Iwu himwevulu wa chekala Chipompelu mu nyikala yamwamulehi mumatuña awantu eyila. Ichi nawa chikwikala dimu Chipompelu kudi kwejima. Kudi Mwanta wamuneni iwu diyi Nzambi, nawa watutalaña etu nakumona antu jindi, Chipompelu, hichikwambuka, kuzuña mukachi kawawenawu ni kutadikaña hatu yaaku twamukukulu. Chidi chochimu

neyi iwu Mwanta muniyi nsañu yetu yena wakeñeli kumona antu jindi, muchidi windi, kunuñañana.

Iku etu tunakutadeka, chochimu neyi ana antuñi yanyikala chavulameneniwu dina nfunda, etu tunavulameni mudimu iwu wutudi nawu. Amavulu anakukabakana, amavulu hiyamwiluka Nzambiku nawa etu tunemeni hakudikwasha etu aweni nikuditadikishaña wumu namukwawu.

Edmund Burke nidi, “Yejima iyi yinakeñeki kulonda Diyabolu eli antu amawahi abuli kwilahu chuma.”¹ Iku etu saña atukañeshelawu chilumbu chetu yena nakutuña nyidimu yindi, kwakweni namazulu etu.



Kutaña Kwamumukanda Wajila

Iku kutaña kwamumukanda wajila kunakuhosha hakukwiluka chachiha ni chisaka chachiha ichi nawa etu kutunakudami. Mukanda wa Yowanu awusonekeli kudi Yowanu kabanji kaYesu wamwilukili Yesu. Kukutachika kwaniwu mukanda nahoshi hadi chisaka ni chitunekali etu. Ichi chatela chikali chaswaja kulema kudi yena. Mavesi akufuma mu Aefwesesa afuma kudi kaposotulu Pawulu. Wasonekeli Mukanda kuchipompelu cha Aefwesesa.

Tañaku awa mavesi hewulu chakola kudi izanvu, hela neyi antu amakwawu adi nanyikanda yajila nawa akutweshwa kutaña eyi wutweshi kuyihula wena atañi.

Yowanu 1:10-13

¹⁰*Yena wadiñi munu mwishina, mpata yamunu mwishina ayileñeli kuhitila mudi yena, akwampata yamunu mwishina hiyamwilukiluku.*

¹¹*Wenjili kudi yadiñi yuma yindi yomweni, ilañi antu indi yomweni hiyamutambwili yenaku.* ¹²*Hakwila ejima owu akuhweleleli ijina dindi wayinkeli ñovu yakwikala anyana kaNzambi - wowañi akukuhweleli ijina dindi.* ¹³*Wena hiyavwalikili kumashi hela mwatoñwelañawu antuku*

¹ Yinafumishewi kufuma kudi Burke, Edmund (1770) *Yitoñojoka Yinakojeji Katataka Kubula Kwikala Chachiwahi*, kuloñeshakwamuchisatu (3rd), Pall Mall, J Dodsley

avwalikili kudi Nzambi.”

Aefwesesa 2:19-22

¹⁹*“Dichi dinu himudi nawa enyi hela akwetuña dacheñiku, ilaña yenu eni munza wawantu jaNzambi, cheñi nawa yenu akwetala dindi,*

²⁰*anatuñiliwu hachikuku chawa apositolu ni atuprofwetu, Mwanta Yesu yomweni neyi Mwanta welola damwiwombu. ²¹Mudi yena kutuña kwejima anakusumbwañeshi hamu hichikukuula nakwikala tembeli yajila mudi Mwanta. ²²Cheñi nawa nanenu nawa anakuyituña hamu kulonda mwikali mwakushakama Nzambi na Spiritu yindi.”*



Lwihu

Ihulaku ejima adi mwizanzu neyi akwetuhu anyana. Kudi ana adinawu, yihula alumbululi chamwekanaña anyanawu neyi wena.



Muchidi Wawiha

Ilu lwihu lutunafuma hakwihula lunamwekesha Kakavulu mwamwekenaña anyana neyi anwali jawu. Nimunjila yoyimu, Nzambi wavwalaña muntu wejima iwu wekela muka Kristu. Wejima wetu twavwalika kudi spiritu yowumu. Anatwinki wuswa wakwikala anyana kaNzambi. Akwakwitiya atambikaña kweniku kutambwilewa muchisaka cha Nzambi. Neyi tune kali akwaKristu, etu anatutambwili kwikala muchisaka chamunza waNzambi mwahita Kayi konsu.

Neyi chocha chatambwilaña chisaka mwana, wunabuli kwikala mwanawu wakudivwelela awenawu muchisaka chawu, ni Nzambi welaña chochimu nanetu. Nzambi natwilishi etu kwikala amomi ni kututambwila etu muchisaka cha Nzambi. Etu twadiñi chakubula akadi tata wamu spiritu, katataka etu hitudi chochuku, wejima wetu tukweti Tata diyi Nzambi, diyi Mwanta wawejima. Ichi etu Chitunakukula tukumwekana neyi Tata yetu cheñi nicheñi.

Njila yekwawu mwakuhoshela diyi nawu etu tudi iseka dadiha damuchidi wawiha wawantu. Neyi entu hadaha tudi aLunda, aLozi, aBemba, aNyanja, aTonga, aKaondi, aLuvali, aMbunda, aLuyi, aNkoya, aChokwe

aYimbundu indi kwizhi hela tuhu enu mudi aSwahili. Ichi etu wejima wetu tunekali iseka damuchidi waKristu. Hela tuhu Chipompelu inyi kutwakundama etu, indi kwiji chikuku inyi chitukweti, hadaha hela tuhu twaheta ndi kwiji twahutwa, wiyila hela wutooka, wejima wetu tudi iseka da muchidi wumu.

Ma vesi amu Aefwesesa atukwashaña etu kusenda iyi yitoñojoka nakuyiswija hachintampu chekwawu. Munyikanda yachitiyañeni chachikulu, Tembeli muYerusalem ayituñili kulonda kumwekesha nachu Nzambi. Mwadiñi momuna mutembei muyamwekesheliwu kwitiya kwayidika ni yaaku yambokamboka ayimwekeshili kudi Nzambi. Mu Aefwesesa, KaPositolu Pawulu nahoshi nindi, wezhima wetu tudi chidi chaTembeli yaNzambi hamu, tudi yidi yetala odu, ni Kristu neyi diyi ilola damwiwombu. Ilola damwiwombu didu ilola dasweja kulema. Didu ilola datachi kwalewa mumbaño. Nihena helola idi, chikunku chejima chambaño achitulaña aha.

Etu wejima wetu tudi yibalu yakutuña kwaNzambi, munza wawiha.



Lwihu

Ihulaku izanvu neyi itala dikuzatika neyi didi muyikunku? Hela mbashila yawuuma yidi muyibalu? Wukwilanachidi?



Kutuña kwawantu aNzambi hikutuña kwasweja kuditulahu. Neyi chekala tembeli didi iluña mwashakamaña kulema kwawuNzambi windi nawa wukweti wuswa wakufuñununa. Neyi etu hitwadikwataku komana ninyidimu yaNzambi ni wuNzambi windi anawukeheshi. Tudikeñi wumu namukwawu muyipompelu yinamboki amboki. Tunakeñi yisemwa yeñi nayeñi. Tunakukeña antu ambuki kufuma kudi etu. Chakubula wena adi chochu kulema kwa wuNzambi hikukwikala kwakola neyi chikwadikwikalaku.

Mpanji 3: Kukalakesha Izanvu Dawumi Mumukala Weyi



Kufwila

Kutañisha kwanichibalu muniyi mpanji kunakufwila kufundisha kumwekesha mwakuchilila hela Mwakwilila izanvu dawumi mumukala. Nakufwila kweniku kudiza diku iku:

- Tañishaku neyi mazanvu anyanya azataña chiwahi kubadika kutañisha hohu.
- Dizihu jinjila jikwawu Muwatela kukalakala nakutaña kwezanvu danyanya.
- Dizihu mwatela kuhumañana izanvu dawumi mumulungu.



Nsañu: Nkunka Mukesi!

Kwadiñihu mukala mukachi mwamweni mwisaña omo. Chilaaka chanvula chinakumi dehi ni Matahu anyeñumukili mukala owu adiñi amalehi. Atupela amavulu hamu ni anyanya aswamini awenawu munowu matahu kufuma kunkanza yamwaana.

Precious ni Pili adiñi anyana ayedi awa mayala mumukala. Chuma chimu chaswejeliwu kukeña kwilawu ifuku neyi ifuku yadiñi yowu kubanjila tunyama twanyanya tudi neyi anfwā. Hakwila ayiwani Precious wakwatishili kesi kunsā yesaña ni anyama ejima enjileña anakutemukaku nakuya kwakwihi na Pili kulonda ayikwati. Adiñi nakuhema kwakutwalekahu kwakubula kukuma nawa nikukwata nawa yakudya. Mafuku ejima atelekeleña nikudya hanyima yachu!

Kakavulu Precious na Pili afumineñahu hamulungu nantentemena. Amweneña neyi Chipompelu chaletelaña wulesu ni kuleha.

Precious ni Pili adiñi nakocha twesi, bayi neyi chadiñi mafuku makwawuku kwadiñi mpepela. Chatachikili kesi kwiha mpepela yakunkili ni kesi katachikili nyizuzu yamaneni kubadika ochu chichadiñi mafuku makwawu adiñi nakochawu. Chakubula nikuleha iluña dejima dadiñi namatahu dadiñi mukesi akañenyi mwakukañeshela.

Precious ni Pili esekeli kunyemuka nawu kulonda ajimi kesi ilaŋa iyena dahitakeni kudi wena. Ninyizuzu yakesi yaswejeli kutoha. Chakubula nikushimbula jinkunka jakwatili kesi. Yikumba yawantu yadiŋi mukukala.

Precious na Pili atemukili kulonda awani antu akuyikwashaku wena, ilaŋa niwumu wadiŋihu kwadiŋi kosi. Hiyikwanuka nawu dadiŋi ifuku damulungu nawa ni antu ejima adiŋi kuchipompelu.

Hampinji yashikiliwu wena kwitala dachipompelu mazu Nzambi adiŋi atachika dehi. Akwatata hela amayala adiŋi ashakama mbadi yimu awambanda niwena kumbandi yikwawu. Adiŋi wejima wawu nakutiylila kudi Kabiŋa wadiŋi nakutaŋisha. Precious ni Pili esekeli nawu aluwaŋesha mampampa kakavulu, ilaŋa mpinji yejima ayilejeli kudi wudi wejima neyi ekali amweni nzoo kupandakana kuluwaŋesha. Chamwekeni neyi hikwadiŋi ni wumu wakuyitiylila wenaku.

Nkumininaku ntaŋishi chamukatili kumuchima muloŋa waweni nawa wayilejeli nindi fumenu munu mwitala. Akawukalawenu akakushakamisha ayedi enjili kulonda amoni chikupu nawu wena anamweni chikupu nzoo. Hampinji yeniyi Precious hakubidika, “Enu munachitiyi wanyi. Jinkunka jenu jinakwiha!”. Wudi wejima wahayamini nakukwatika mutentu neyi chedikileŋawu nakuya nakutala chumanyi chinakumwekana.

Mwalala chacheni, jinkunka jajivulu jadi nakwiha. Antu afumini kuchipompelu atachikili kuzata hamu kulonda ajima aka kesi. Atwesheli nawa kupulwishaku jinkunka jikwawu jajivulu ni yikumba yadiŋimu. Jinkunka jikwawu jahili kumu nimaheta hamu niyikumba yakuhanda nachi kumujimba yachihandili chamuntu yayisaka yahandililimu.

Antu ahilili chikupu nawa ehwili, “Muloŋanyi chimwabula kutuleja etu?” Precious ni Pili atachikili kudila. “Etu tweseka”, dichi hosheluwu, “ilaŋa enu himwatiylilaku. Enu mwadiŋi hohu kwenu nakutiylila kukutaŋisha ichi chaletesha kubula kusha muchima nakutiylila etu.” Hela chochu Precious ni Pili diwu chamaposu atachikili aka kesi, hela chochu mu swayi-swayi ayanakeneni nawa niwudi wejima adikwashili hamu nakukwasha ana ajimbesheli yejima. Ejima wawu hamuntu hamuntu asanyikili nawu



akuditiyililaña wumu namukwawu chakubadika kufuma aha!

Lwihu

Ihulaku izanvu indi iyi nsañu yinalumbulukidi? Kuhwelelaku kwakula kwawu nawu chalema hama kuzatila hamu. Kwakula kwakweni kuwunakukeña kwikali nawu chalema hama kutiyilila na kudiza kufuma kudi wumu namu kwawu. Neyi antu hohana hatachi atiyilili kudi Precious na Pili, hadaha yuma yadikwikala mwacheñi. Neyi Precious na Pili adiñahu neluña muchipompelu hakutachika mutenowu kesi kadi kutachika wanyi.



Tumazanvu Twanyanya Mumukanda wa Nzambi

Mumukanda waNzambi tunatañi hadi a kwakwitiya ahumañeneña hamu mutumazanvu twanyanya mumatalawu ni maluña makwawu. Kadizanzu kanyanya kadi hohamu neyi izanvu dawu wumi idi ditunadiñi nakuhoshahu mukudiza kwetu. Hizanvu dawantu awa ahumañanaña hamu kakavulu:

- nakutaña Mukanda wajila wamazua aNzambi
- nakushilañena wunsahu wakuhandu kwawu hamu
- nakwanakana Mwanta Yesu nikuhumuna dinkendi hamu
- kulomba hamu
- ekali naluwi, kuhanaña mali awu na muchima wasubuka hamu nikudibonda na mpinji yawu
- amuhameki nakudifukula hamu
- ekeli ayinsahu hamu²

Neyi chitunamoni etu dimu mwamweni mwakuyilila imu mutwakalakeshelaña etu namazanvu awumi.

Antu amavulu anakujonoka nawu indi iyi yitoñojoka yatu mazanzu twanyanya yinakufumina kudihi. Yinakufumina kukwila kwa akwakwitiya atachi iku kutunamoni etu mumukanda wajila waNzambi. Niyipompelu yatachi mumukanda wajila hiyadiña yipompelu yamaneniku kafwampi

² Pastors.com/Rick Warren, 2012. Yimañu yitanu nayiyedi yezanzu danyanya dinakuhanda chachiwahi [KUTIYANANA KW AMUMPEPELA] Kudinakuwanikewa ha:

<http://pastors.com/seven-marks-of-a-healthy-small-group> [Akuwenini ha 28 Kakweji wachishika muneni 2017]

mukwesekeja yadiñi yawantu atensha amwishina dawantu makumi atanu. Neyi mukwesekeja, neyi eyi wukutaña mukanda wuyasonekeleliwu akwa Añaliya chinamwekani neyi awusonekeleli kudi antu amukadi izanvu kanyanya bayi omuwunatoñojokeliku.

Mazanvu awakwa Kristu ahumañanaña mumatala, hanzi yampwembu yachipompelu hela muma Sinagogu mwidimi dawa (Yudeya nawu yipompelu). Wena hiyadiñihu nayipompelu yakutuña yamatala neyi iyi yitudi nayu etu makonuku. Nawa hihadihu ninohu hanateniwu chachenu yipompelu yakutuña yawa kwakujila munyikanda yachitiyañenu chachihaku. Akwakujila adiñilaña nakuhumañana mutumazanvu twawantu antesha mumatala. Etu tunakuya nakushinshika hanyevulu yiyedi yakutalilahu yamumukanda wamazuzi aNzambi.



Kutaña Kwamumukanda Wajila

Yipompelu mumukanda wa Aroma ni Filimoni yadiñi mu Roma sweje mumusumba wa Kolose. Iyi yipompelu yahumañeneña mumatala awantu, bayi muyipompelu yakutuñaku.

Aroma 16:3-5

³*Iñimushili Priscilla na Aquila akakukalakala hamu nanami mudi Mwanta Yesu Kristu; ⁴wena akeñeli kufwa kukola wumi wami: hiyami nayiisakililaña hohu kankawamiku, ilaña hamu niyipompelu yonsu yawa Ajentili nawa. ⁵Hohamu nawa iñimushili chipomppelu chekala mwitala dawu. Iñimushili wami inakeña Epenetu, yena diyi wasambilili kwitiya Kristu mu Asiya.”*

Fwilemoni 1:2

²*Kudi muheletu Afiya, ni mukwetu ishidika Akipusa ni akwachipompelu chekala mwitala deyi.”*

Chetejewa chikupu kuhumañana neyi izanvu danyanya neyi izanvu dawumi mumukala weyi. Ichi hikuchila chikupu mwaza Mukanda waNzambi.



Mudimu Wakwila: Chisela Cha Lufuchi Nakutemwisha Itemba

Ikalaku nawantu akudihanahu awaana wikali nawu kulonda ekali muchisela “chakutemwisha itemba”. Imu dimukwikala muntu wumu emani woloka sululu nakukwata kunyendi yanona wudiyi nindi wumu, iku nakami nakolola makasa indi kumbindi yawena hamaseki, ichi chidi neyi itemba. Lekaku antu adi mwizanvu ekali nayisela yalufuchi yamboka. Lumbululaku neyi muchisela chakutemuka twadi kudikeña wumu namukwawu nikukeña kukalakela hamu neyi tunakukeña kuyika muchisela. Ichi chidi neyi mwizanvu dawumi mwekala kuzatila hamu neyi hichuma chachiwahi.



Mazanvu Awumi atukwashaña etu kwikala neyi Kristu munyikala yetu

Mwizanvu dawumi etu tukutwisha ku:

- swayi-swayi tukumona neyi wumu nakuyayata hela mosiyi
- tukwashi antu kulonda ashi chikuhwelelu chetu mukukalakala hamu (neyi chisela chakutemwisha itemba).
- ejima adizilaña hamu ni
- kuditiyilila wumu namukwawu (neyi muyina nsañu, Nkunka Mukesi!)



Kutaña Kwamumukanda Wajila

Mukanda wa Yakoba wenzala to-o nakuleja mwakwilila ni maana. Nakufwila kwindi kwakweni kweneni kudi yowu antu kulonda ashi yikuhwelela yawu mukukalakala nyidimu bayi kukumina hohu dakuhoshaku!

Yakoba 1:22-25

²²Bayi kwikala akwakutiylila kumazu hohuku, nakudidimba enu aweniku, ilenu munahoshi mazu. ²³Wena akukumina dakutiya kumazu ilaña kwilamu nehi adi neyi antu anamoni mpolu zha mensu awu muchibanjilu, ²⁴hanyima yakudimona awenawu hiyakuya anavulameni dehi ocha mwekanawu. ²⁵Ilaña wukutalamu mulushimbi lwakuwanina lwahanaña kukasunuka watwalekamu chakubula kuvulamena omu munatiyiwu ilaña hakwilamu wenowu akukoleka mwejima mwakwilawu.”



Lwihu

Ihulaku izanvu indi wena anatoñojoki nawu indi ichi chiketu chamazu aNzambi chinalumbulukidi? Kwakula kudi chiña nawu kushaña mazu aNzambi nakuyikalakesha chiña kuyikonkomwena. Yihuliwena indi anatoñojoki nawu izanvu dawumi dikuyikwasha wena kwilichi. Ichi chikukwashaku eyi kupezelesha kwiluka kwezanvu.

Kunooka – Idi didu iluña hakwila kudiza mukwibaluli mumaseka ayedi.



Mwakutwamini Izanvu Dawumi

Lumbululaku neyi munichi chibalu chakudiza tunakuya nakutaña mwamweni mwakuloñeshela nikutwaminina izanvu dawumi kudihi ni mpinji yakuhumaña.

Kudihi Ni Mpinjinyi Yakuhumañana

Izanvu dawumi datela tuhu kuhumañana kudi konsu mumukala, Atela tuhu kuhumañana mwishina damutundu, mushikola, mukapundu hadaha hela mulubanza. Nichuma chasweja Kulema chitukusendahu yowu nawu hiluña kwakwila wudi wejima nasumbuki hela wakasunuka kuhumañana nawa chamwekanaña hampinji yakwila wudi wejima natweshi kwinza nakupompa. Wukutweshi kukeña kukañesha yipompelu yatuñawu dehi neyi antu anakukeña kuyaku wanyi.

Muwatela kukalakela hakupompaña kwezanvu dawumi

Mukutaña kwakuchipompelu Ntañishi waswejaña kuhosha HAMA ni antu atiyililaña. Mpinji jikwawu antu nawa hiyatiyililaña cheñi nawa mpinji jekwawu atela kuzeya nikuleka kutiyilila. Kakavulu hikwekalañahu mpinji yakwila antu ehuli malwihuku. Antu adizilaña kudi antwamina.

Mwizanzu dawumi Ntwamina wukuhosha MWANTESHA nakulumbulula Yuma. Kukwikalahu mpinji yakuhanjeka nawantu amakwawu muchinalumbulukili. Antu nawa akutweshi kwihula malwihu. Antu akutweshi kulombela hamu hayuma yinakukankilawu hela jinjala jinakukeñawu kulonda kumukalakela Mwanta Yesu mwashikila. Kukwikala mpinji kulonda antu atweshi kusenda munahoshi Mukanda waNzambi

nakufukula nawu indi chinalumbulukidi mukuhanda kwawu.³



Mudimu Wakwila: Chisela Cha Ngunja⁴

Ichi chisela atela kuchihemena hanzi kumbidi yawudi wejima nawa niwudi wejima amu konkomweni ahemi chisela hamu. Hachisela chenichi eyi wukukeñahu kangunja kanyanya. Neyi hiwukweti yimuku wunatweshi kukalakesha chifumpa (hela ifunda dayi papili yamalanjeli yakukasa), hela yibeli yamahina yakuvuñavuña hamu hela mukabu wudi neyi ibula dehompola hela ilalanji. Wukukeñeka chuma chikwikala chikali chaswayi iyi kuchinatila hadi muntu.

Tuñaku izanvu dawantu atanu nasatu emani kumbidi yakapeka. Tachikaku kuhema nangunja munoyu ngunja yiwanalumbululeña iku wunakutaña iwa mazu.

Hemaku chisela changunja kankaweyi

(Nataku ngunja mwiwulu wuyakili cheñi mapampa Kakavulu iku wunakuhosha.)

Neyi nikuhema ichi chisela changunja kankawami nochu ami inakwila lwela ilaña kosi mukwawu wunakufunda mwakuhemena. Hanyima yakapinji kanti antu akwikala nawulesu wankutala chinakuhema ami. (Konkomwenaku izanvu diwudi nadu kumbidi amwekeshi kanefawundi nikutwalekahu nakunata nikukwata ngunja nkaweyi kulonda kuchimwekesha). Ichi nawa dichichidi neyi nlomboli wezanvu wukusweja kuhosha yena hohu. Mukuleha kwa mpinji antu akuleka kumutiyila akukwatahu hohu janti.

Hemaku chisela cha ngunja namuntu mukwawu wumu

(Nataku cheñi ngunja kumbidi ni kunyima hadi muntu wumu wudi mwizanvu iku eyi wunakuhosha).

³ Mwevulu wakutalilahu “Wakuhosha chanti nikuhosha hama” anafumishi mukutaña Kushimatisha mudi Yesu kufuma Mumukanda wakudizisha antu anenzi hamu. Ndotolu Wakuluka yitembi Revd A. Morgan. Resource.

⁴ Iwu mudimu wunafumishewi Mukudiza kwa Alpha: Mukutwaminina kadizanvu kanyanya. Alpha Kayi kejima

Neyi nikuhema ngunja namuntu mukwawu akutachika kwiluka indi chisela chakuhema ngunja chidi neyi yika. Hadaha anakudihujola malwihu hela hadaha anakudilumbulwila chalumbuluka yiketu yamazuru amumukanda waNzambi hawumi wawu. Niwena nawa adi muchisela. Helachochu, ichi chidi hohu hadi ami ninona muntu mukwawu wumu. Wudi wejima hadi mokuku iyami hohu wumu wuchidi nakwila yuma yejima yakutañisha nikuhosha.

Hemaku chisela changunja na wejima

(Tachikaku kunatila ngunja hadi muntu wudi wejima wamwizanvu danyanya iku nawa anakukufuntishilayu cheñi eyi hanyima yakumunatilayu muntu).

Mwizanvu dawumi chikwikala chachiwahi neyi wudi wejima wukukwatahu makasa. Ichi chikwikala neyi muntu wudi wejima wamwizanvu wudihu neluña dakwihula malwihu nikuhosha chinalumbuluki mazu achiketu amumukanda waNzambi mumawumi awu. Wudi wejima nakudiza. Wudi wejima nakwatuhu. Makasa chachiwahi.

Hameku chisela cha ngunja ilaña munjila yambuka

(Tachikaku kumbila ngunja hadi wejima mazanvu danyanya mukufuntisha yikonkomweni wena anatili akwawu anaditalañanuwu nawu mensu henohu kanda ayi natili kudi eyi.)

Injila yasweja kuwaha yoyakwila neyi hinlomboli wanyi diyi wudi nakwakula malwihu ejima. Mpinji yikwawu chachiwahi neyi antu amakwawu akwakula malwihu awakwawu nikulumbulula imu munatwesheliwu makukala awu muwumi wawu. Ichi dichi chisela changunja chachiwahi.



Lwihu

Ihulaku izanvu indi injila yimu yidihi yanatoñojokuwu nawu yayiwahi kukalakesha mwizanvu cheñi muloñadi?



Mudimu Wakwila: Hemenu ngunja mumazanvu nakuhiñahu cheñi

(Wukukeñekewa kwikala nangunja yimu hezanvu hezanvu.)

Eyi wukukeñeka ngunja yimu hezanvu haniyi mpinji yambuli ejima adi mukapeka ekali mumazanvu awantu atanu nasatu (8). Sakulakuhu muntu

wumu ekali neyi mukwakutwaminina akwawu. Mupinji yanti sakulakuhi njila yimu hadi oyu jiwana jatela kuhemawu kudi izanvu cheñi yileji wena kulonda adinatili ngunja yifuma hadi iwu yiya hadi iwu munjila yoyimu neyi chiwela eyi. Ichi chidiku namaleñu chanti, nakulumbulula nawu wudi wejima nakwatihu makasa nakuchila nawa aweni awu.

Chalema kuhumañana antu mukachi kwakuhumaña kwamazanvu

Chasweja kulema hama nawa bayi neyi kukonkomwena kwetu hamu bayi kwikala hohu neyi etu tunahumañaniku. Chikwikala hadaha hela wumu indikwiji kumukonkomwenaku mukukalakala nyindimu. Neyi mukwakuloñesha izanvu eyi watela kuya nakwendela akwezanvu mulungu hi mulungu hela tuhu. Ichi nawa chidi chochimu nikudi ana antu ayaña nakupompa mwizanvu ilaña kanda ekali akwa Kristu. Yitali niwena, shilañenaku mpinji yeyi nawena nakuyi konkomwena. Ichi chikuyikolesha wena.

Kukala kwamwekanaña dikalu nimutwatela kuchimanishila

Mwatela kwikala makukala mumazanvu makwawu iyi yatela nlomboli kukalakehahulu kulonda kukolesha izanvu. Neyi izanvu dikutachika kukalakala mwatama antu hiya kutweshahulu kuyikonkomwena nakwinzaku.

Kuchimwekesha ichi, Ihulaku owu antu atanu nasatu enjili kumbidi nakuhema chisela changunja enzi cheñi. Tunakuya cheñi nakumwekesha nyevulu yikwawu yakutalilahu.

Muntu wasweja kuhosha hosha

(Nataku cheñi ngunja kunyima nikumbidi kudi muntu wumu kulonda yanukishi antu.)

Kakavulu mwizanvu mwekalaña hadaha muntu wumu wakeñaña kwakula lwihi lwejima nikuhoshahulu hachuma chejima. Wena akutweshahulu kuhosha hama chakwila akwawu makwawu kutweshahulu kuwanahu iluña dakuhosha chuma chikwawu nehi.

Indi eyi neyi nlomboli hadi ichi eyi wukuchila ñahi? Indi eyi wuku hoshahulu neyidi kulonda wuyikanishi?

Neyi wahosha neyi, “Yowanu wunasweji kuhosha hama kumishaku kuhosha ichi” indi ochu Yowanu wukuchitiya ñahi? Wukumuneñesha nawa hadaha hakenza cheñi mwizanvuku.

Eyi watela kuhosha yuma yidi neyi ichi, “Yowanu oku kunadiñi kwakula kwakuwahi indi awa amakwawu akuhosha nawudi?” Yowanu hakuneñaku ilañã wukwiluka nindi watela yena amwenihu kulu kulonda wudi wejima niyena ahoshihu.

(Lekaku kunatila ngunja hadi muntu yowumu ichi natilaku kudi amakwawu acheñi nawa.)

Muntu wansonyi wukubula kwakula malwihu hela kuhosha

(Nataku ngunja yifuma hadiwu yiya hadi iwu ilañã wukilukileñahu muntu wumu.)

Indi wukuhosha neyidi hakwila wumukwashi iwu muntu ahoshi?

Neyi wahosha neyi muloñadi, “Chiwabula kuhosha, eyi wasupa?” Anna wukuchitiya neyi wasupa nawa cheñi hambakenza cheñiku. Ilañã eyi watela kuhosha neyi ichi, “Anna eyi wunakumwekana neyi wudihu nayitoñojoka yayiwahi. Eyi wudihu nayakuhosha nanichi?” Aha hekwawu yena wukukasunuka kulonda atweshi kuhosha.

Mpinji yekwawu antu akuhosha, “Nehi kwami hinakukeña kuhoshaku.” Neyi chidi chochu yileki wena atwalekihu nakutiylila. Kakavulu hanyima yakwila neyi izanvu dinayi dehi mukapinji kantesha awa antu akwikala nachikuhwelela hama nawa akutwalekahu nakudiñija mujimpanji munyilungu yekwawu.

(Nataku ngunja kufuma hadi muntu yiya hadi muntu nakuyinyeñumwisha mwizanvu cheñi kushilahu ninowu muntu wamwena.)

Eyi ichi yileji owu antu adi hanahu mwizanvu ayi ashakami.

Owu muntu wahosha nindi kwakula kwaluwa

Neyi muntu wukuhosha yuma yidi neyi, “Hinakuhweleliki nami Yesu hi Nzambi.”

Ichi eyi watela kwakula nakuhosha chuma chidi neyi ichi, “Nami nawa nadiñi nakuchikuhwelela sampu ninohu hinamuhumañeni nawa wahimpili wumi wami” hela, “Etu amakwawu hanu tunakuhweleli mwamboka, ilaña twayenu tutwalekenuhu nakutaña kulonda tumoni mumukanda waNzambi wunahoshi nawudi.”

Neyi muntu wukuhosha yuma yidi neyi yakwandala eyi watela kuhosha yuma yidi neyi iyi, “Oyu yinatyakani kuwaha ami kanda nichitiyañahu dehi kudi muntu mukwawu kuchihosha ichi.”

Indi eyi wukuchitoñojoka neyi akutiya ñahi neyi wahosha neyi, “Wunaluwañeshi, indi eyi wukukuhwelela ochu ñahi!” Chikuletsha wena kutiya kutama hama.

Wena hiyamba kafunta cheñi kwizanvu kamuchiyediku nawa eyi wunajimbeshi iluña hela mpinji yakushilañena walala wa Yesu Kristu nawena. Bayi wakamena antu kwiluka yumaku mumulungu wakutachika. Etu antesha hohu yetu twenjili nakumwiluka Yesu. Etu amavulu twadizileña mwanti na mwanti.

Izanvu dinakubula kutwalekahu kukalakala nampinji

Kuhanjika kwawa kwezanvu dawumi hikwatela kupandakana ma ora ayediku (2). Muniyi njila antu atela kupompa chaswayi. Atela apompeleña hampinji yoyimu wejima wawu hamu mulungu himulungu. Neyi akupompaña cha matulukela antu akwikala nakaneñawudi akuleka. Neyi akutwalekahu kutemuka lufuchi kwamatulokela antu akuchileka. Hela tuhu mumaluña amwamulehi mu matuña awantu eyila kwekala mpinji kwawu hiyayikoleshaku, iyi yuma iyi yalema.

Antu atadikishaña mazanvu etu awumi

Mpiji yikwawu antu akutadikisha mazanvu etu awumi mumukala. Antu

afukulaña swayi swayi. Ninjila yayiwahi yikukañesha ichi yowu kutiyaña chachiwahi nawantu nakulombelega hadi chuma ichi. Ikalaku wakasunika nayuma yiwelaña nimuwachililaña. Ikalaku nampinji yakuchilumbulula kudantu. Neyi wunatiyi hadihu chuma chidi chejima chabula kuloña eyi yaku wakachilumbululi mwatelela kudowu muntu kuwachitiyila. Tunachimoni Kakavulu yuma yamuchidiyi kuyikañesha.



Mukwihishisha Nsañu

Hitulukaku munsaña ya Precious na Pili, indi adikwikala ñahi akoola nakwimika mushindu neyi aditiyilili wumu namu kwawu. Yanukishi cheñi antu chisela changunja nihadi nyitu yambokamboka mwatelela izanvu dawumi kukalakela mumukala.



Kulomba

Yeleji antu ekali mumazanvu awu amunyikala. Lejaku hamuntu hamuntu kulonda alombi hamu hewulu chakola. Alombi nawu Nzambi wukuyikwasha wena atachiki izanvu dawumi mumukala wawu.

Ihulaku izanvu neyi anamutiya Nzambi kuhosha kudi wena nindi atela kuhimpa njila munakwililawu yuma mumukala wawu. Neyi chidi chenchu yili emana nakulomba nawu Nzambi wukuyikwasha wena amoni wudi wejima neyi esakana, kulonda kutañila kufuma kudi akwawu nikukalakela antu.

Mpanji 4: Wudi Wejima Wukweti Iluña



Kufwila

Ichi chibalu chakutaña chinakufwili kukwashaku antu kutiyisha mwatelela chisaka chaNzambi kukalakela hamu mumukala wawu.

- Kwilukisha chidi mujimba wa Kristu
- Elukishi nawu wudi wejima mudi Yesu wesakana
- Eluki mwazatikilaña izanvu dawumi mumukala wawu



Kukenwinamu Chanti

Neyi wunakushimuna nsañu yawakaka weneni, chimoni neyi antu ejima anemani kumbidi munoku kapeka kulonda wudi wejima amoni chachiwahi. Chimoni chikupu neyi wunayikwashi mweneni anakudihanahu kufuma mwizanvu hatela kwimanawu nichakwilawu.



Nsañu: Wakaka Weneni

Kwadiña wakaka weneni heseki. Wadiñi wasweja kutooha chakwila ndimi ahimbeleli kuwubwitamu nakuwulandisha na mali amavulu.

Dichi nawa ndimi wayili nakuwubwitamu.

(Sakulakuhu wumu hakachikawu ekali neyi ndimi, wumwihuli eli neyi cheliliyi owu ndimi, chayileñayi kwitempa kulonda akañuli owu wakaka.)

Wabwitili (*Iwo muntu abwiteña*), wabwitili (*muntu nakubwita*) nawa yena nakubwita, (*muntu nakubwita*). ILAÑA AKA! Kutwesha kuwubwita owu wakaka nehi.

Ndimi hakuhayama indi wukumukwashaku yena hinyi, imu dimu mwatoñojokeliyi “Nukuya nakumusenda ñodami.”

(Mukonkomweni owu muntu wunadihanihu ayi nakusenda ñodindi hakachi kanowu anapompi.)

Chakwila neyi ñodindi namutondi dehi, watela emani mumusululu kunyima yanowu ndimi amukwasheñaku yena kubwita.

(Neyi owu adihanuhu anazañalali, chinateleli wena kwimana kunyima

yanowu ndimi mumusululu nakumukwata mumbunda yanowu muntu wudi kumbidi. Ichi chikumwekana neyi munakubwita wejima wenu hamu. Twalekakuhu nakushimuna iyi nsañu nakuyilobola awa anadi hanuhu.)

Ichi dinu funtulukakumu nakweseka neyi chinachinadiña nakubwitawu awuna wakaka. Ichi chikufuntulukamu nakushañamu muntu wumu hampinji kulonda kutuña musululu wawulehi kulonda wubwiti iwu wakaka weneni.

Ndimi nañodindi hiyakutweshwa kubwita kankawawuku ichi ñodindi hakuya nakusenda mwaana.

Iwu ndimi, ñodindi, ni mwaana kutweshwa kubwita iwu wakaka nehi ichi mwana hakuya nakusenda mwana wamumbanda.

Iwu ndimu, ñodindi, mwana weyala ni wamumbanda kutweshwa kubwita iwu wakaka nehi ichi mwanawu wamumbanda hakuya nakusenda kawa.

Iwu ndimi, ñodindi, mwanawu weyala, mwanawu wamumbanda nikawa kutweshwa kubwita iwu wakaka nehi dichi kawa hakuya nakusenda kamesha.

Iwu ndimi, ñodindi, mwana weyala, mwana wamumbanda, kawa nikamesha kutweshwa kubwita iwu wakaka nehi dichi kamesha hakuya nakusenda infwa.

Na infwa, ichi akutweshwa kubwita iwu wakaka.

Awa anadihanu ayisakililiku.

Yikonkomweni ejima afunti muyitwamu yawu kulonda wejima wawu adikuwi.



Lwihu

Ihulaku izanvu nyitu yaniyi nsañu yinayi mudihi? Kudi iñakwilu jiyedi yiwunakukeña kumonaneyi wudi wejima nakwiluki:

- Twatela kuzatila hamu.
- Muntu owu wazeya niyena nawa walema wudi hohamu neyi ona muntu wakoola.

Kufuma nikwiluka mazanvu aneluki chibalu chakulema chakuzatila hamu muniyi nsañu, ilañia hiyinachilukishi nawu wuswa waniwu wazeyelamu newena walema.



Kutaña Kwamumukanda Wajila

Nyikanda yakuyipompelu yaku Añalija ni Akorinda ayisonekeli kudi Kapostolu Pawulu. Ni munyikanda yindi, kunuñañana, kuzatila hamu ni kwesakana diyi nyitu yansañu yinamwekanumu kakavulu. Ichi chinalumbuluki nawu yalema. Chalema hama kutaña yiketu yejima nakuyimanisha. Eyi hadaha wakukeña kunuñia ichi chiketu chamazu chidi mu Añilija naniyi nsañu yitunatiyeña katataka yawakaka weneni. Nichiketu chidi mumukanda waAkorinda chinalondelihi kufumina aha.

Añalija 3:26-29

²⁶Muloña mudi Kristu Yesu enu ejima mweladehi anyana kaNzambi kuhitila mukukuhwelela, ²⁷muloña wejima wenu apapatishiliwu mudi Kristu munadivwiki Kristu. ²⁸Hikudihu kwikala cheñi kaYudeya indi kwiji KaHeleniku, hikuduhu kwikala cheñi nduñu hela wabula nduñuku, hela kwikala cheñi iyala hela mumbandaku, wejima wenu munekali wumu mudi Kristu Yesu. ²⁹Neyi munekali ambala aKristu, komana munekaladehi mbutu ya Abrahamu ni answana achikaninu.”

1 Akorinda 12:12-31

¹²Chiwuneli mujimba, wumu wunekali nayidi yayivulu, niyidi yamujimba yayivulu, yineli mujimba wumu. Dichi chekalayi niKristu nawa. ¹³Wejima wetu atupapatisha dehi mudi Spiritu wumu kulonda twikali mujimba wumu, hela tudi Ayudeya indi kwiji Aheleni, nduñu hela wabula nduñu, nawa wejima wetu atunwisha dehi kudi Spiritu wumu. ¹⁴Hela chochu mujimba hiwekala nachidi chimu hohuku ilañia anawituñi nayidi yayivulu.

¹⁵Neyi mwendu wukuhosha nindi, “Chinabuli kwikala chidi hinekali

wamujimbaku,' komana hanekali wamujimbaku, tahindi. ¹⁶Neyi itu dikuhosha nindi, 'Muloña chinabuli kwikala disu hini wamujimbaku,' komana hanekali wamujimbaku, tahindi. ¹⁷Indi neyi mujimba wejima wukwikala disu hohu wukutiya nanka? Neyi mujimba wejima wukwikala wakutiya, hohu wukutiya nanka ivumba? ¹⁸Ilaña Nzambi nashi mumujimba yidi yejima, hachidi hachidi neyi momu mwakeñeleliyi nindi yikali. ¹⁹Neyi yejima yadiña chidi chimu hohu, mujimba wadi kwikala kudihi? ²⁰Neyi chichidi, kudi yidi yayivulu, ilaña mujimba wumu.

²¹Ni disu hidikutwesha kwila chikasa nindi, 'Eyi hinakukeñaku!' Nimutu hiwukutwesha kwila nyendu nindi, 'Ami hinakukeñaku!' ²²Eña, mwalala niyidi oyu yamujimba yinekali neyi yaheta iñovuku, diyi yikweti mudimu. ²³Niyidi yitwatoñojokaña netu yabula kulema chalala diyi yitwalemeshaña nankashi, niyidi yikweti nsonyi diyi yabadika kulema, ²⁴hakwila yidi yetu yalubanji hiyakalaku. Ilaña Nzambi napati chachiwahi mujimba hamu, nasweji kulemesha yidi yabula kulema, ²⁵kulonda mumbuli mumujimba kwikala kwambuka, ilaña chiña yidi yejima yihembañani chimu nachikwawu. ²⁶Ilaña neyi chidi chimu chikukaba, yidi yejima yakabakenaña hamu; hela neyi chidi chimu akuchilemesha yejima yidi yazañalelaña hamu.

²⁷Enu mudi mujimba waKristu muntu himuntu nekali chidi chamujimba owu. ²⁸Nzambi nashi muchipompelu akusambila apostolu, amuchiye di atuprofwetu, amuchisatu ankuluñaña, himukulonda akakwila yihayamisha, ni mawana akuuka, ni ankwashi, ni akwakuyula, ni akwakuhosha madimi eñi na eñi. ²⁹Ejima hiya postolu, tahindi? Ejima hiya tuprofwetu, tahindi? Ejima hiyankuluñaña, tahindi? Ejima hiyakwakukoña nyidimu yañovu, tahindi? ³⁰Ejima akweti yamukunkulu yakuuka, tahindi? Ejima ahoshaña madimi? Ejima alumbululaña madimi? ³¹Fwilenu nankashi yamukunkulu yabadika."



Ejima aweti iseka dakwila

Wudiwejima hadi etu washakamaña mumukala wamwiluka Kristu, atela kumukalakesha kudi yena kulonda eli nyidimu yakubadika. Kudi mwakuhwelelaña antu nawu chiña wikali nkuluñaña, kambina hela mukwakushimuna nsañu yayiwahi kulonda akalakali yuma yaNzambi.

Kwekala cheñi chikuhwelelu chakuhosha nawu kala hohu muntu muchipompelu hakwetihu lusesa lwakwila nyidimu yaNzambi muchituñilu chawu wanyi. Ichi hidimuku hela hanti!

Twayenu tutoñojokuhu hanawa mavesi amumukanda wa Añaliya awa itunadiñi nakutaña. Ni mutu wansañu yidi munawa mavesi adi nawu etu wejima wetu tukweti mwanta wetu Yesu Kristu wumu, himwadikwikala yambu mukachiketuku. Hela munyichidi, hela mukulema, hela yambu yamakowa indi kwiji kutaña kwamashikola hela tuhu chuma chidi chonsu. Etu wejima wetu tudihohamu kumesu aNzambi. Kabiña hakutweshaku kuleja Chipompelu chindi mwakwila, nañovu jindi hijadi kwikala neyi ochoku. Samaheta wumu wamuchipompelu hakutweshakwika nawuswa wakhosha muchipompelu kupandakana kazweñiku. Chineli wejima wetu twesakana chinalumbululi nawu twatela kukalakala nayipompelu yetu ni izanvu dawumi munjila yoyimu.

KaPostolu Pawulu nakukalakesha mwevulu wakutalilahu wamujimba wanetu awenetu kulonda yitukwashiku etu kwiluka yumi. 1 Akorinda 12:12-31 dimunalumbululuwumujimba wa Kristu. Muntu wejima, chidi chejima chamujimba chalema kulonda kupepelesha kukalakesha mujimba wetu.



Lwihu

Indi ichi chinakulumbulula chumanyi munjila yakwila nawu yuma muyatela kuyikakeshela muyipompelu yetu kudetu ni mazanvu awumi awa itu nakufwila kutachika munyikala yetu? Inkaku muntu wejima mpinji yankontolu yakuchinda yakunyinu yitanu mumazanvu anyanya mukwikala antu asatu hela atanu kulonda ahoshi hachumichi. Neyi mpinji yidikoku Ikalaku nakapinji kanti kulonda wutiya Kufukula kwayitoñojoka yawu.



Chuma chachiwahi mumukanda wasonekeleliwu aka Akorinda dichi chakutena nawu achina chidi chabulañovu hela chakehelamu mumujimba wamuntu anachilemeshi hama. Ichi chinakulumbulula nawu niyidi oyu yitwatoñojokaña netu yazeya hela yamukunkulwayi (wudi wejima wukwiluka ninoyu yidi chiyalumbuluka!) iyi nawa diyi yidi yalemeshayi

Nzambi. Munjila mwamwenañayi Nzambi antu mumazanvu etu
nimunyikala yambuka chikupu nanomu mutwayifukwilaña etu wena.
Chekala chakukuvumika nawatu anasekeshewi kwikala kumbidi.

Munu wakanyansa wanyanya wamwekana neyi hiwukweti mudimu
walemaku. Eyi nawa hadaha waadikukuhwelela neyi wukusenda mupanga
nakuwuketulaku ni chambu chikumwekana kosi. Ichi chaluwa. Chakubula
munu wakanyansa hiwukutwesa kwimana cholokaku. Na Antu anabuli
nyinu yakanyansa anakukeñeka kudiza chakwenda cheñi.

Indi kwiji chikwikala ñahi namunu weyi wedimbanu? Hichekala chidi
cheneni hela chikweti ñovu kumujimbaku. Hela chochu neyi
wukuwujimbasha hichikwikala chaswayi kudi eyi kunona yuma
nakuyitwala hewulu kulonda kuyikalakeshaku. Hela tuhu chanyanya
chasweji kulema hama!

Etu wejima wetu tukalakeshenu mawana etu

Kwikala adi hohamu mumujimba waKristu neyi mutu, chinakulumbulula
nawu etu wejima wetu tudi nayamukunkulu hela mawana nawa tudi
neseka hela mudimu wakwila. Neyi tukushinshika hachiketu chamu
Akorinda tunakumona nyevulu yikwawu yakutalila:

- apostolu
- atuprofwetu
- ankuluñaña
- nyidimu yañovu
- kuuka
- kukwashana
- wulomboli
- kuhoshaña mumadimi

Kudi mawana ayamukunkulu amavulu anateniwu mumukanda wajila
waNzambi. Nikukutanjika Pawulu nakuhana nyevulu kuchipompelu chawa
Akorinda. Nakuyihula neyi hadaha muntu wumu welaña iyi yuma
yejimiyi? Kwakula kudi nehi!

Munjila yoyimu ni atela adikeñi wumu namukwawu nimawana awa anatwinkiyi Nzambi etu hamuntu hamuntu. Wejima wetu hamu twakola nawa ichi dichichidi neyi etu tukwila munakukeñayi etu twili mwakubadika.

Owu adi hanzi yaChipompelu bayi tuyishiya hohuku!



Kutaña Kwamumukanda Wajila

Matewu wasonekeli yuma yamwekeni muwumi waMwanta Yesu kulonda etu tulukishi chumanyi chadiñi chalema kudi yena. Iku kutaña iku himwevulu wakutalilahu wakwila Mwanta Yesu nakuzañalesha ana adiñi hanzi yawantu jaNzambi nakwikala nawu. Ichi nawa chasweja kulema kudi Nzambi.

Matewu 9:9-13

⁹Chañidiyi Yesu nakupandakanayi kufuma kwenoku, hakumona iyala ijima dindi Matewu, nashakami kwakutambwila nyombu. ‘Hakumwila nindi,’ nlondi, ni Matewu hakumulonda.

¹⁰Chadiñiyi Mwanta Yesu mwitala nakudya, kwitala da Matewu, ansonkeshi nawa ankwashidi amavulu hiyakwinza nakudya chimu nindi na atumbanji twindi. ¹¹Chanachimowu ichi Afwarisi, hiyakuyihula atumbanji twindi nawu, ‘Muloñadi inkuluñaña yenu chadilañayi nawansonkeshi ni akwanshi?’

¹²Chanachitiyi, Yesu hakwila nindi, ‘Akola hiyakeñaña chimbukiku, ilaña chiña akata. ¹³Ilaña yenu mwakashinshiki mwalumbulukila ichi: “Nakeñi luwi, bayi chimuna chakuketulaku.” Muloña hinenzi nakutambika aloñaku, ilaña akwanshidi.’



Lwihu

Indi ichi chinalumbulukidi sweje omu mutwekalilaña nawusoku nawantu adi hanzi yachipompelu? Awa antu atela kuyila neyi ahanzi yachipompelu hela atela kuyikokweja kulonda ekali neyi hayakwachibalu chachisaka? Inkaku wudi wejima mpinji yankotweli yakunyinu yitanu mutumazanvu twanyanya mudi atu asatu hela awana kulonda ahoshi haniyi nsañu. Neyi



mpinji yidikoku ikalenu nakampinji kantesha kakudilejamu.

Kakavulu muchipompelu ni akwa-Kristu twambukañaku nanowu itu namoni netu 'hiyakwanshidi'. Twakuhwelelaña kushakama kwakulehi nawena. Etu twakuhwelelaña netu amakwawu hiyantu atama nawa akututamisha ninetu neyi twikwikala nampinji nawena. Ichi hidimuku nawa imu hidimu munatulejiyi Mwanta Yesu kwilaku.

Muniwu mwevulu wakutalilahu Mwanta Yesu washakamini nakudya hamu nawansonkeshi adiñi akwanshidi. Ansonkeshi ayimweni neyi hiyantu asweja kutama nankashi. Kwiluña kwashakaminiyi, iluña dinatenuwu nawu Isarela, mwashakamini awa mashidika awa ka Aroma. Antu achiheleli ichi. Ansonkeshi akalakeleli aka Aroma, kutambula nyombu ni kuhana kudi a Aroma. Niwena hampinji jikwawu atwambileña nawa adiñi namaseleka, nikutwamba cheñi nawa aswekeleña mali amavulu awawenawu. Wenawa adiñi hakachi kamukanka wawantu aswejiliwu kuhelawu mu Kenani. Ilaña Yesu watwalekilihu kuya nakwikala nampinji nawena.

Hidimu hohu muneliwu nawa etu twikali mujimba iwu wakwila antu ejima esakani. Etu nawa anatwili twikali mujimba wakutambwila ana adi hanzi enzi tudinuñi nawu mumujimba owu. Tutambiki antu enzi ekali nampinji nakuhanjika nanetu hamu na Kristu. Mazanvu etu awumi atela enzunuki kudi MUNTU WEJIMA muyituñilu yetu yinatandumuki, hichidihu nansañu nanochadiwuku ni nanochu chaneliwuku.

Mwanta Yesu henjili kudi owu amwilukiliku ilaña kudi ana ambulili kumwiluka. Ninetu twatela kwila momumu.



Lwihu

Ihulaku izanvu indi antu amuchidinyi ana abayokañawu hela alekañawu munyikala yetu? Mwiwihi hoshenuhu indi niwena twatela kuyibombelamu ñahi?



Kukenwinamu Chanti

Ichi chibalu chakudiza chalema hama. Bayi kukumina dakutaña hohuku, antu atela mwinzanvu amoni omu muchatela kuzatikila nawa ni chumanyi

chikumwekana. Yikwashiku atiyishi ichi, chatela chimwekeni kumbidi yawu. Kwakuhosha nawu “Mwevulu walumbululaña makombakaji amazu!”



Mudimu Wakwila

Iyi nyidimu yinakushimuna chatela izanvu dawumi kukalakala. Chamwekeshañi nawa kukolesha mawana awantu ambokamboka neyi mukuyikalakeshela hamu ni mwatela kwilawu kuhanda kwawantu nikukolesha kukalakala kwanyidimu.

Kumbidi yakapeka kakutañishila. Ihulaku akakudihanahu ayedi enzi kumbidi. Lumbululaku neyi awantu ayedi diwu anafukuli kuloñesha nakutachika izanvu dawumi munyikala yawu.

Ihulaku ana antu jeyi ayedi anadihanuhu kulonda ayinakunona antu amakwawu atanu nasantu, awa akwikala mamembala amwizanzu dawu. Awa nawa atela ejima wawu emani kumbidi mumusululu, iku anakutalisha kudi antu.

Lumbululaku neyi idi didu izanvu dawumi kubadika mutukweji tutanu nakamu tunahiti, anahumañaneña hamu mulungu himulungu. Ahumañanaña hachiyedi namwana kufuma ha mpinji ya 15:00hrs nakushika ha 17:00hrs mukachi kawantu ikumi ni antu ikumi na atanu nawumu apompañi kala mulungu. Afumaña kuyipompelu yambokamboka wena nawa anadiñi nakukalakesha yuma yakutañisha nachu yinayinkiwu wena mukudizisha.

Lumbululaku neyi mudi nyichidi yamboka yawantu munidi izanvu. (Ninyichidi yinamboki yawantu anayisoneki aha nawa eyi watela wulumbululi muchidi wanowu muntu. Chimoni neyi eyi wunakulumbula nawa chinakwashiku owu ejima anadihanuhu).

Mukwakuloñeshi ni mukwakumukwasha

Wejima wawu hamu anafukuli kutachika izanvu. Ahosheli kudi amabwambu jawu nikutambika antu amboka kufuma kuyipompelu

yamboka ni munatoheli mukala wawu. Munahiti tukweji tutanu nakamu wudi wejima mwizanzu nakuli. Awa ejima nawa achidi anafumi kuyipompelu yambokamboka, cheñi nawa ayedi hakachi kawa hiyayaña kuchipompeluku ilaña anakutoñojoka hadi nsañu iyi.

Antu ayedi eluka kutañishaña anyana

Amweni anyana amavulu mumukala. Mulungu wudi wejima wena anamoni chinayishi anyana kunsu ya Chipompelu. Wena anafukili kwilahu chuma hachenichi nawa nimulungu wudi wonsu anatachiki kutañisha ja Mwanta Yesu nikwikala nayisela nawanyaana mumukala. Ichi chamwekeni muloña ayi konkomweneni kuzatisha mawana awu nimukwakuloñesha izanzu wayikonkomweneni wena achili ichi!

Muntu mukwawu wudi ntañishi wamuwahi

Iwu nakukwatisha iyi yuma yakukalakesha swayi swayi nawa cheñi nesekihu ni mwanti mwakuditwaminina mukutaña yamwenindi. Iwu mukwakuloñesha amwihuli neyena ni mbwambu dindi akutwesha kuya kumukala wadikumawu nawu nakutachika izanzu dawumi kweniku, nakutañisha antu amakwawu. (Anukenu etu twahoshelihi dehi muniwu Mukanda “Kutambikaña Mabwambu”).

Antu Asatu Akakudima Matempa

Wumu hakachi kawu wudi nayitoñojoka yakudimahu kadi tempa kulonda kukwashahu akadikija kudimaña yakudya. Ayedi amakwawu mwizanzu atoñojokeli kumukwashaku yena.

Antu ayedi awa achidi kanda ekali akwa Kristu

Enzaña kwizanzu mulungu wejima. Anakuswina kwakwihi na Yesu.

Chinakukula izanzu detu hitu kwiluka mawaana etu nikutukonkomwena kwashikilamu nyidimu ya Nzambi munyikala yetu yinakuli. (Twalekakuhu nakufuntulukilahu haniwu mutu wansañu sampu anachitiyishi.)

Yisakililiku owu adihanahu wuyileji afunti muyitwamu yawu.



Yetu hohu tunateli kuchili ichi chimwekani!

Ni antu hohu atela kuya nakushika nikukwasha nyikala didu izanvu da wumi. Diwu antu anatondiyi Nzambi munyikala kulonda kukeña nikukwasha amakwawu. Mukanda wajila wa Nzambi wunayiteni awa antu nawu Nyitonde Yakola Yakuloña (Isaya 61:3). Kudikukala kweneni kunakukañesha antu kukalakala nakwilahu chuma chawu awenawu. Aha dihu hitunakuhweleli netu antu akufumina hanji akwilahu chuma chanetu. Ichi chinakulumbula nawu etu hitunakukeña kwilahu chumaku nawa tunakuchimbela hohu chuma chakabula nikwinza.

Ichi shakamenu (mudantu) muchimbelelihu chuma kumwekana. Twalekakuhu kuchila ninochu chichukuleta kaneñawundi, hadaha hadi mpinji yankotweli yakunyinu yiyedi. Ihalaku izanvu, chumanyi chikumwekana neyi mukutwalekahu kushakama amunu? Iñakwilu yowu nawu kosi.

Munjila yoyimu, neyi etu tukutweshwa wanyi etu awenetu nakutachika ni kukalakala nezanvu da wumi hadaha kosi chuma chikumwekana munyikala yetu.



Kulomba

Etu twatela tulomba netu Nzambi wukuya nakukumisha kubula kunuñañana, nkunyi ni kubula kwanakena munyikala yetu. Shaku izanvu mutu mazanvu twanyanya mudi antu asatu hela awaana. Ichi lombaku neyi:

- Nzambi wukunuña yipompelu yinamboki kuhitila mukutachika kwe izanvu da wumi
- Hikukwikala nkunyiku
- Ni nsañu yamwekeni kunyima yahita dehi akuyanakena

Chikuhĩñamu yileji antu alebeleliku mukala wawa weneni. Anukenuhu antu acheñi muchituñilu nikumwihula Nzambi ayileti wenowu kwakwihi na yomwenindi.

Ihulenu Spiritu Wajila kulonda aleti kwanakena mukachi kawantu awa ana kulombela hamu.

Mpanji 5: Kulumbulula kwa Yuma Yakukalakesha



Kufwila

Iyi himpanji yakuchimwekesha nakufwiila netu wudiwejima nenjilili nayuma yakudzisha nachu chikupu iyi yiwunakuzatisha cheñi nawa watela kuyikalakesha niyena chachiwahi.



Iyi himpinji yakuhanjika hohu. Iyi watela kusenda yuma yakuzatisha yinakuzatishawu kudi akwezanvu dawumi nakuyihana kudi antu anakupompa.

Eyi watela wilukeñahu dehi yuma chachiwahi neyi chiwunadiñi nakuyikalakesha nezanvu dididejima dawumi diwunazati nadu. Chinatwwesheki nawa antu iwu nakufundisha niwena nawa akwinjilila kuzatisha oyu yuma.

Tachikaku kudishilañena hayuma yiwakeña hanoyu yuma yimanadileji nawena. Cheñi nawa inkaku wudi wejima mpinji hela iluña kulonda atweshi kushinshika hadi yuma oyu hadi kampinji kantesha.



Nimudimu wawuwahi kwila Ihulaku wudiwejima mwizanvu ekali nakuya nakutwaminina muchibalu chacheni chajiyama kufuma kunoyu Yuma. Watela kuzatasha mpanji yimu nikwihula antu amboka-mboka kulonda atañishi yuma yacheñi. Neyi mwevulu wakutalilahu, muntu wumu atañishi vesi yakanañachima, muntu mukwawu atwaminini mumpinji yakudihujola, cheñi namukwawu watela atwaminini mumpinji yakulomba.

Iyi kuyikonkomwena antu hanyima yakwila neyi aneseki dehi nakuyileja nawa mwaneliwu chachiwahi mumensu akuwunda yileji yitoñojoka yekwawu mwatela wena kwililawu chachiwahi.

Eyi hadaha hiwukutwasha kwikala nampinji yakuhituluka mumpinji yejimaku, ilaña mukwila ichi awantu makwawu imunakuhanjika nawu mumpinji akuwana iluña kulonda atweshi kumoonu mwatelawu wena kukalakesha iyi yuma.

Mpanji 6: Kuloñesha na Kutanjika Kwayuma



Kufwila

Iku hikudiza kwakuchimwekesha mwakuchilila nakufwila mwakuloñeshela mwatela izanvu atachiki mazanvu awumi mumaluña awu nawa nimpinji yatelawu wena kuchila. Ni kufwila kwakudiza diku iku:

- Hakwila anatudizi amwizanvu aloñeshi mazanvu awumi.
- Kulonda elukishi yintampu yikwawu yikulondelamu yakumbidi.
- Adizi mwakutanjikila.
- Muchinalemeni kukalakesha oyu yinatwinkiyi Nzambi etu.



Ichi chiketu chamazu amumukanda wajila waNzambi anachifumishi mumukanda wa Matewu. Ni nsañu yayeni yidi yowu kukalakeshi oyu nyidimu yinakukunjikuwu eyi munjila yaloña na maana alala. Ichi chiketu chansañu chinakushimuna jinjeki ja wuru yitwatela kutaña kulonda yilumbululi jintalenta jetu, yamukunkulu ni wuswa wakuzata. Ni muntu wukuyikalakesha chachiwahi aka mwinka masomu, ona wukutiya wooma hanakumukalakela mwanta windiku akumubabesha.

Matewu 25:14-30

¹⁴*Cheñi, chikwikala neyi iyala ona wayileña hawenyi, iwu watambikili añamba jindi hakuuyishila mahetindi.* ¹⁵*Kudi wumu hakumwinka jinjeki jitanu ja wuru, mukwawu maseka ayedi, nikudi mukwawu iseka dimu wudi wejima kwesekeja nañovu jindi. Hakunyemuka hakuya hawenyi windi.* ¹⁶*Ona muntu watambwili njeki jitanu jawuru hohenohu wayili nakujilandujola hakuwaninahu jekwawu jitanu.* ¹⁷*Chochimu nawa ni watambwili njeki jiyedi wahetelelihu nawa jekwawu jiyedi.* ¹⁸*Ilaña ona iyala watambwili njeki yimu hakuya nakupunda heseki hakuwewekahu mali ankaka yindi.*

¹⁹*Chihanalehi nankashi nkaka yanowu anduñu hakwinza hakuchindulula mali awa nawena.* ²⁰*Ona iyala watambwili njeki jitanu hakwinza hakumuletelahu jekwawu jitanu. Nindi, 'Eyi nkaka wanyinkeli jinjeki jitanu ja wuru. Tala, nahetelelihu jekwawu jitanu.'*

²¹ *Nkaka yindi hakwakula nindi, 'Chachiwahi wunduñu muwahi washinshika! Wunashinshiki yuma yantesha; nukukwinka wanta wayuma yayivulu. Inzaku mumuzañalu wankaka yeyi!'*

²² *"Ona iyala watambwili jinjeki jiyedi hakwinza nawa. Nindi, 'Eyi nkaka wanyikeli jinjeki jiyedi ja wuru. Tala nahetiliku jikwawu jiyedi.'*

²³ *Nkaka yindi hakumwakula nindi, 'Chachiwahi wunduñu muwahi washinshika! Wunashinshiki nayuma yantesha; nukukwinka wanta wayuma yayivulu. Inzaku wiñili mumuzañalu wankaka yeyi.*

²⁴ *Ona iyala watambwili njeki yimu ya wuru hakwinza nawa. Nindi, 'Eyi nkaka, nakwilukili nami wumuntu wakala, wamunaña kuwunabuli kukuwa wakuñulaña kuwabulili kumwañila mbutu. ²⁵ Dichi natiyili wooma, hinukuya nakuvumbika wuru weyi heseki. Tala, yuma yeyi iyi.'*

²⁶ *'His master replied, 'You wicked, lazy servant! So you knew that I harvest where I have not sown and gather where I have not scattered seed? ²⁷ Kachi, washili mali ami kunyambawulu, kulonda ichi chinenzi nitambuli yami niyakulunjikahu.*

²⁸ *Dichi mutambulenu njeki yidiyi nayu mwinki ona wukweti jinjeki ikumi.*

²⁹ *Muloña wukweti akamwinka wakaheta yayivulu. Hakwila wabula akamutambula ninaka kadiyi naku. ³⁰ Iwu nduñu wamukunkulu mumbilenu hanzi, mumwidima kwakekala kudila nakudisumona Kumaji.' "*



Etu tukweti mudimu wakukalakesha mawana nikwiluka oyu yatwinkayi Nzambi etu. Lumbululaku neyi iku kudiza iku kwasweja kulema neyi chitunakuloñesha mwakukalakeshela jintalenta jetu (neyi jina jinjeki ja wuru jidi muyiketu yamaz). Etu tunakukeña kwikala neyi ona nduñu washinshika, bayi ona ikoopiku!



Kutaña Kwamumukanda Wajila: Mavesi amakwawu hansañu yakuloñesha nakutanjika

Awa mavesi anayifumishi mumukanda wamazw aNzambi nawa anakutwinka etu wunsahu wantesha muloñadi chitukuloñeshela nakutanjika. Yitañi nakuyilumbulula hachuma hachuma kudi izanvu.

Yishimu 15:22

²²Habula mpuña yuma yiwafukwili kwila hiyamwekañaku, ilañã havula akwakushakama hampuña yakolaña.”

Yishimu 16:3

³Kunjikaku nyidimu yeyi kudi Yehova niyiawafukulaña akayikolesha.”

Yishimu 20:18

¹⁸Yuma yejima yafukulañawu antu yakolelaña kumpuña; kwataku kunjita chakudilejaleja maana.”

Yishimu 21:5

⁵Yitoñojoka yamukwakudikita yatwala kwamukuvulisha hohu; ilañã antu ejima eleña yakulundumukila alondaña kubula.”

Twatela tutachiki izanvu nawa, nikukalakesha nyikanda yekwawu yinatwinkiwu, yakukalakesha chipepeleshi kudi antu kulonda enzi kwakamwili na Yesu. Etu bayi tukuhwelala muntu wacheñi kwila iwu mudimuku, twatela tudihanihu kuchumichi etu awenetu.

Kuhitila mukukalakala kwetu, Nzambi wukuhimpa nyikala yetu.



Awa mavesi awaana itunafumi tuhu nakutaña hakuloñesha nayitoñojoka yinakutuleja etu kwila iyi:

- tutoñojoki
- tutambuli wukwashi ni kulombola
- tukunjiki yuma yejima yitukwila kudi Yehova
- ikelenu akwakudikita

Kufukulanyi kutunakukeña kwila etu?

Etu hamuntu hamuntu tunafumi munyikala yambomboka, nikuyikuku yamboka nawa. Hitukwetihu lusesa lwakwila yuma yasweja kuwaha ni yawu Nzambi mumukala wetu. Tukutweshwa kuzatila hamu nakutachika mazanvu awumi mumukala wetu.

Ichi chinakulumbulula nawu tufuntenu cheñi kumaluña etu nakutachika kukuñwija antu hamu mwizanzu. Nanawa antu anakukeñakewa afumi muyipompelu yayikuku yambomboka ni mumukala wejima. Hadaha tukukeña kuhosha nawa nlomboli ambokamboka hakwila ichi chimwekani.



Mudimu Wakwila: Ilaku Yitoñojoka

Chasweja kulema hama kuchimona nawu antu adi mumazanzu amumukala wawu atelela kunafumuwu haniwu mudimu. Wejima wetu hamu izanzu datela diwanishi yitoñojoka imu mwatela wena kutachikilawu izanzu dawumi mumukala wawu.

Wukukwasha eyi hinyi cheñi nawa wunakukeña kuhosha nanyi?

Sendaku izanzu dimu ayi anoni chipapilu cha A4 aleñihu injiñumuki hakachi. Iyi injiñumuki yinakwimenaku mukala mwashakamañawu. Yileji asoneki ijina da mukala hewulu danowu mufunda wanjijumuki.

Ihulaku izanzu ni izanzu aleñi jinjiñumuki jinakwimenaku mazanzu awantu amboka mboka munyikala yawu hanoyu yinkunku yayipapili. Ninawa mazanzu awantu atela kwikala hekwawu hichipompelu, hela añameni ja Mwanta, akwa mama hela antañishi neyi mwevulu wakutalilahu. Chalema hama neyi akuchilukishi nawu atela kutanjika mazanzu ejima adi mumukala wawu. Ichi chikwikala chakutambikawu antu kufuma munodu izanzu.

Yilenu wena asoneki majina awantu amwizanzu dejima mumukakala hewulu danjiñumuki hinjiñumuki.

Lumbulaku neyi ichi chinakwimenaku neyi kaposhi kakutalilahu hanodu

iluña. Esekejaku neyi etu tudi nkwayi wunakulelela hewulu damukala nakutala hesekei.

Mukachi kanjiñumuki yejima yidi hachipapili yinakwimenaku izanvu dawantu ilaku izanvu disoneki majina hadaha asatu hela atanu awantu awa akutambikawu kulonda enzi adibombi nawena mwizanvu dawu dawumi. Chasweja kulema hama neyi mukusenda antu amwizanvu deneni ichi chikulumbulula nawu chalala idi hinnanvu damumukala.

Kuzatisha chikunku chawu chachipapili, ihulaku mazanvu atali hamajina hanasonekiwu. Awa antu adihaniku kudikuñulula kufuma mumukala weyi atela ekali haniku kutanjika. Chinjikijilu hela katumbwa kanadikumi kudi ayedi hela antu asatu atela kukwashaku kukalakesha idi izanvu. Toñojokaku indi wena akwila chumanyi hakwila akukwashi. Eyi wunakukeñakeña akwaKristu akola akushindamena awa akwikala kumbidi.

Eyi ichi wunekali dehi nanaha hakutachikila kwenzanvu dawumi nawanlomboli alala hohamu nawa nawantu akwikala mwizanvu alala iwatela kutambika.

Eyi watenala nawa kutambika antu nikuloñesha mpinji kulonda kwila ichi.

Kudihi ni mpinjinyi

Chintampu chikwawu yowu kutonda mpinjinyi ni iluña kwatela kuhumañana izanvu. Ichi atela kuchisoneka hewulu da chikunku cha chipapili cha A4 aha hadi nyifunda yanjiñumuki kulonda kubula kuvulamena. Anukishaku wudiwejima neyi atela atoñojokuhu iluña dakasunuka kulonda antu ahumañenuhu dadiwahi nawa hampinji yatelela. Ninidi ifuku datela dikali mukamwihi na nyilungu yiwana.

Ichi chineli chawantu, yanukishi wena bayi atemeshi hohu mazuku. Atela ayi kulonda akayimoni awantu, awenawu hamu. Kuhosha nawantu awenawu nikuyihulaña wena hakudihanawu kwawu kukuletesha yuma kukoñewa.

Humañanenu nakulomba: hichuma chalema!

Lumbululaku neyi chalema kuloñesha nakutanjika kuhumañanaña kakweji hikakweji kulonda kudilembelelaña wumu namukwawu nikuhanjika hadi kuloñesha chinakwenda mazanvu awumi. Ihulaku izanvu hiizanu asoneki nakulumbulula indi ichi chakazatika mpinjinyi hewulu da kabeta kachimunswa kachikunku chachipapili chawu.

Ihulaku wukwashi wukwawu

Chitunakuya nakwila ichi tunakuya nakwesekeja Kufukula kwetu mumazanvu awana tuhoshihu indi kukalanyi kutwatela kuhumañana. Yambuli owu antu adimu mumazanvu awana, swejee anafumi mumaluña amboka amboka haniyi mpinji, nawa yihuli wena atanjiki makukala anafukuliwu nawu akuyiwana. Yinki mpinji yankotweli yakunyinu yitanu hakwila ichi.

Neyi aneli dehi ichi, yili wena ahanjekihu indi akukañesha ñahi awa makukala. Ichi chalema hanu antu anakutwaminina kupompa kwanawantu hamu atuñi awantu nakushamu mpinji nakushakama nezanvu kulonda atweshi kushamu kwiluka kwawu. Ichi nawa atela kuchila neyi izanvu dinahani kwakula.

Ichi dinu itejaku mazanvu akuli na mazu wumu namukwawu.

Itejaku mpinji yitanu hela ikumi hakuchila ichi.



Kulomba: Kunjikenu kudi Mwanta (inkotwelu yakunyinu ikumi)

Ikalenu nampinji yakulembelelaku iluña dinemeniwu. Muniyi njila etu tukukunjika iluña hiluña nimpuña yitunafukuli kudi Mwanta. Ilenu ichi antu anyeñumukeña nakudilembelelaku wumu namukwawu. Ichi chakwashanaña kuchimona neyi wudi wejima nakwatihu makasa nawa washakama momumu.



Ikalenu akwanyitalaji

Ichi chibalu chikuhosha hakulema chikwikala wadihana nakwilaña mutunahoshi. Nyitalaji diyu yaleteshaña chambu mukachi kakukalakala

kwachuma hela chuma kubula kukalalakawa.



Kutaña Kwamumukanda Wajila: Mavesi makwawu hansañu yawutakalaji

Awa mavesi anafumi mumukanda wa Nzambi anahoshi hadi nyitakalaji ni muzañalu.

Aroma 12:6-8

⁶Etu tukweti yamukunkulu yambuka, mwaya luwi lwatwinkeliwu etu. Neyi chamukunkulu cheyi hikuproweta, dichi profwetaku mwatweshekela kukohwelela kweyi; ⁷neyi himudimu shaku muchima kumudimu weyi; neyi hikuleja akwenu wushi muchima kukuleja; ⁸neyi hikukonkomwena wushi muchima kukukonkomwena kweyi; neyi hikuhana hanaku makasa ayedi; neyi hikulombola chili nakashinshi; neyi hikumwekesha luwi chili nakuseha.”



Mudimu Wakwila

Ichi munawa mazanvu awana mumunadiñi yihuli antu adilumbululi wumu namukwawu yinadihanayi yomwinindi kwila. Yikonkomweni antu ekali hayikomu nakwanuka majina nimafuku ichi nawa chikuyikwashaku wena kwanuka kuloñesha kunatanjikiwu nakudihanahu nankashi. Wukufukula neyi antu atela kudinka manambala awu anyonji yakutiyañena wufukuli cheñi neyi muntu hi muntu akatemeshelihi mukwawu mazu akumona nawu wejima wawu anelimu omomunahoshi nawa akuchila.



Muwihi

Anukishaku mazanvu hajimpuña jinakasiwu. Yanukishi wena adilembeleli wumu namukwawu nawa ekali akawutakalaji. Wuchimoni neyi anachiluku nawu adi nawukwashi wunakufuma kwinzanvu yakwila yuma wejima yikwilawu kulonda chiyikwashi.



Kulomba

Nezanvu kulomba kusendi muntu wejima kulonda alombeleli iluña hamuntu hamuntu. Lombaku neyi mpuña yawu yikulumbuluka.

Nsañu



Tukwatenu etu ha hello@dignityonline.org.uk
or +44 (0)7340 573 937.

Hanyitu yansaŋu yejima hamu nimawuseya
tuwanenu hamonji wamumpepela wakutiyaŋena:
www.dignityonline.org.uk/publications.

Lunda 1st Edition



© Jon na Judith Witt na Dignity. Dignity kusonekesha kwamutayi kwawa kwaluwi
akwakukwashana na nambala 1122656. Dignity (Worldwide) izanvu dadimena
dakola mukutwalekahu, dadisonekesha mu putu nimu Wales hanambala 6394480.